

Elgoibar - 1281. zenb.
XXI. urtea - 2023-03-31



TRIKOM

BARREN



Fotolosu Photography

Ikuskizuna ziurtatuta

Kilimon Trail

LAN-DEIALDIA

Udaldirako hezitzaileak behar ditugu

ESKATZEN DA:

- Hezkuntzarekin zerikusia duten ikasketak amaituta izatea edota begirale titulua izatea.
- Ahozko euskara maila handia izatea.

BALORATUKO DA:

- Aisialdian lan-eskarmentua izatea.
- Elgoibarkoa izatea.
- Espezializazio ikastaroak egin izana.
- Hezkuntza Premia Behar Bereziatiko ikasketak nahiz esperientzia izatea.
- Herrigintzan jardun izana.

KONTUAN HARTU BEHARREKOAK:

- Hautagaiek proba bat egin beharko dute eta hautaketa-sistemaren irizpideen araberako merituak ere baloratuko zaizkie.
- Hautatuek oinarritzko prestakuntza-asteburu batean hartu beharko dute parte.



CURRICULUMAK BIDALTZEKO EPEA:
Apirilak 16, igandea

Non eta nola:

- + www.elgoibarkoizarra.eus
- + 943 741 626 / [643 499 169](https://www.whatsapp.com/channel/00299111111111111111)
- + kudeaketa@elgoibarkoizarra.eus



Denolan

ASESORIA EMPRESARIAL
AHOLKULARITZA



Muzategi, 1 - Eibar
943 20 16 80



Pedro Migel Urruzuno, 31 - Elgoibar
943 74 18 00

Lan-aholkularitza ■ Zerga-aholkularitza ■ Kontabilitateko aholkularitza ■ Merkataritza-aholkularitza

Argitaratzailea:



Babeslea: Laguntzaileak:



Aita Agirre Kulturgunea, 3, 3. ezk.
20870 ELGOIBAR

☎ 943 744 112 - 📞 688 655 658

Publizitatea: ☎ 943 743 704 - 📞 688 769 657

barren@elgoibarkoizarra.eus

barren.publi@elgoibarkoizarra.eus

www.barren.eus

BARRENEK bere gain hartzen du espazio arazoengatik iragarkiak lekuz aldatzeko eskubidea. Barrenek ez du bere gain hartzen Iritzia, Hitz eta klik eta gutunak ataletan adierazitakoan erantzukizunik. **Koordinatzailea:** Ainhoa Andonegi. **Kazetariak:** Ainhoa Andonegi, Asier Orbea, Ainara Argoitia. **Hizkuntza arduraduna:** Ainara Argoitia. **Publizitatea:** Leire Rubio. **Maketatzailea:** Zaloa Arnaiz. **Atari digitaleko arlo teknikoaren arduraduna:** Aitor Lauzirika. **Administraria:** Amaia Arrizabalaga. **Kolaboratzaileak:** Manu Sanchez, Iosu Juaristi, Iñigo Lamelas, Edurne Izagirre, Paula Heras, Ane Astiazaran, Izaro Etxegibel, Jose Ramon Cabrera, Alex Segade, Ane Kortaberria, Asier Guisasaola, Maialen Sanchez, Leire Kerexeta. **Inprimategia:** Gertu Koop.E. **Tirada:** 4.700 ale. **Lege gordailua:** SS-1.038/92 ISSN 1138-1855.



facebook.com/barrenaldizkaria



twitter.com/barreneus



instagram.com/barrenaldizkaria




youtube.com/@Elgoibarrennet

Alex Segade

Kazetaria

Kirola *show* bezala ulertuta



"Kirolak kirol izateari utzi dio eta negozio bihurtu da, ikuskizuna, aisialdia, denborapasa"

Heldu da garai bat non kirola ez den betidanik ikusi dugun kirola. Futbola, saskibaloia, txirrindularitza, tenisa, auto eta moto lasterketak... urteak pasatu ahala profesionalizatu joan dira poliki-poliki, eta orain ikusten dugun maila mende hasieran baino handiagoa da kirol guztietan. Profesionalizazio horrekin batera, ordainpeko telebista ere sartu zen kirolean. Lehenengo, futboleko, eta gero, beste kirol askotan. Kirolak kirola izaten utzi dio eta negozio bihurtu da, ikuskizuna, aisialdia, denborapasa. Sakelako telefonoa, telebista edo ordenagailua piztu eta telesailak ikusi beharrean, kirola jarri. Netflix itxi, eta Dazn ireki.

Telebista irekian zerbait ikusi daiteke, baina kopurua alderaezina da orain dela 10 urte genuenarekin. Kirolaren ikusleria oso zatituta dago eta masifikazioa futboleko baino ez dago. Oso zaila da orain milioika pertsona partidaren bat edo edozer aldi berean ikusten egotea, edozer hori eskuragarri ez dagoelako. Gainera, teknologia berriekin audientziak neurtzeko era aldatu eta zaildu egin da. Ez kirolak bakarrik, telesailak, irratiko programak, abestiak, liburuak... kontsumoa ez da erraza neurtzeko. Horrela, streaming plataformak kirolera iritsi direnean, beste aro berri batean murgildu da kirola.

Baina kirolak badu zerbait berezia egiten duena: iragarrezina da. Filmeak, podcastak, telesailak... gidoi bat dute idatzita; abestiak, liburuak... hasiera eta bukaera bat. Partida batean, lasterketa batean, ez dakigu zer gertatuko den. Luzatu daitezke, emaitza ezberdinak izan edo ezustekoren bat gertatu. Predikzioak badaude eta askotan betetzen dira, baina noizbehinka guztiz kontrakoa gertatzen da. Emozioa du kirolak, eta hori da ezberdintzen duena eta harrapatzen duena.

BARENek ez du bere gain hartzen Iritzia eta Eskutitzak ataletan adierazitakoen erantzukizunik. Eskutitzak ondo identifikatuta egon behar dute. Ez ahaztu izen-abizenak, NANA eta telefonoa jartzea. Bidali helbide honetara: barren@elgoibarkoizarra.eus

Eskerrik asko, Elgoibar!!

Zaporeak elkartetik, eskerrak eman nahi dizkiogu Elgoibarko herriari jasotako babesagatik. Aurten 800 kilo txitxirio jaso ditugu. Izugarria izan da! Eskerrak baita ere, Udalari dirulaguntza emateagatik eta lokala lagatzeagatik, eta ezin ditugu ahaztu Marian eta Amaia plaza merkatuko fruta dendak, Txillarre eta Santa Ana kaleko Eroski, txitxirioak jasotzen laguntzeagatik. Datorren urtean berriro ikusiko dugu elkar! Mila esker, Elgoibar!! Zozketako zenbaki sarituak hauek dira: Pilon: 155 eta 105. Maala: 181 eta 229. Txarriduna: 374 eta 152. Saridunek 649 908 704 zenbakira deitu behar dute.

Zaporeak

XXVIII. Jose Gurrutxaga Krosa

Elgoibar Ikastolaren izenean eskerrak eman nahi dizkiegu joan den igandean, martxoaren 26an, ospatutako XXVIII. Jose Gurrutxaga Krosa antolatzen lagundu zuten guztiei: DanobatGroup, Bira-Tek, Elgoibarko Udala, Elgoibarko Udal Kirol Patronatua, Kutxabank, Rural kutxa, El Diario Vasco, Original, BM, Bronymec, Cordon-Vilarchao, Gipuzkoako Anbulantziak, Ego-Toki, Gare Radio Club, Santi Arriola eta Juanjo Gurrutxaga. Bestalde, eskerrik beroenak baita ere, parte-hartzaile guztiei eta laguntzera gerturatutako guraso guztiei.

Jose Gurrutxaga Krosa Batzordea

Emaginak existitzen gara

Lehen Mailako Arretako emagina naiz Osakidetza osasun zentro batean. Nire zereginen artean, haurdunaldian, erditu ondoren, zein emakumeen bizitzako etapa desberdinetan, sexu eta ugalketa osasunarekin erlazioatutako arreta ematea daude, emakumeen eta haien familien osasuna sustatu eta gaixotasunei aurrea hartzeko helburuaz.

Hori dela eta, Elgoibarko osasun zentro berriari buruzko notizia kuriositatez irakurri nuen joan den astean. Eskainiko diren zerbitzuen deskribapena egiterakoan, ordea, beste behin ere, Osakidetza Lehen Arretako emaginak aipatu gabe utzi dituela

ikusitako. Seguraski, Osakidetza edo Osasun Sailburuari galdera eginez gero, inor ez dela emaginekin ahaztu erantzungo dute, erizainekin batera, "emakumeentzako gunean" (ez du azaltzen zer den) edo "besteak beste" atalean sartu gaituztela. Dena den, nik nahi baino sarriago gertatzen den lapsusa da hau; 2018an argitaratutako Euskadiko Lehen Mailako Arretarako Estrategiak ere emaginok ikusezin bihurtu gaituen.

Sinetsidazue, lan ederra da gurea eta, ondo lan egiten dugunean, emakumeek eta euren familiek benetan eskertzen digute. Hala ere, soldata ordaintzen digun enpresak gure presentziaren berri izan eta adieraziko balu, Osakidetza emakumeen osasunari behar duen tokia egiten hasi dela sentituko nuke. Badakit ez gurea ahaztutako profesional bakarrak (harreran dauden administrari laguntzaileez ere inor gutxi gogoratzen da) eta BARREnera idazteak ez dituela gauzak aldatuko, baina existitzen gurea partekatu nahi nuen zuekin.

Ane Guilló

Kiroldegiko langileak lan-baldintza duinen alde

Azken hilabeteetan, udal kiroldegiko langile azpikontratatuok gure lan baldintzak hobetzearen alde mobilizatzen ari gara. Gaur egun, 2012ko soldata %10 murriztua dugu. Izan ere, 2012an, BPXport enpresak, Patronatuarekin adostuta, akordio bat sinarazi zigun eta gure lan baldintzak prekarizatu zituen, horregatik 11 urte izan ditugu soldata igo gabe.

Prekariatate-egoera horren aurrean, langile guztiok bat egin dugu, eta mobilizatzen hasi gara; galdutako KPIak berreskuratzea ekarriko duen soldata-igoera bat eskatzeko. Hipotekak igo dira, erosketa-saskia garestitu da, garraioa ere bai eta guk ezin dugu 2012an baino soldata apalagoekin jarraitu. BPXport enpresak ez digu KPIaren hobekuntzarik eskaintzen, eta 2012ko soldatarekin utzi nahi gaitu. Enpresak hobekuntzak izan ditu lizitazio-prezioetan, baina ez die langileei eragin. Argi dago 2012ko soldata ez dela nahikoa gaur egun.

Bien bitartean, Patronatuak ez du parte hartzen, ez du konponbiderik bilatzen, gure kartelak kentzen ditu, eta ez du gurekin bildu nahi. Konponbidea eskatzen dugu! Soldata duinak nahi ditugu!

Kiroldegiko langileak - ELA sindikatua



Zuen kekek, galderak edo txaloak bidaltzeko: barren@elgoibarkoizarra.eus



943 744 112




688 655 658



Santa Klarako kantxa berria

hondatuta dago: "Santa Klarako kantxa berriak ez du hilabete ere iraun. Lurreko zorua jasota dago, eta zuloz beteta. Penagarria".



Espaloiak libre laga behar

dira: "Autoentzako topeak jarri arren, gidari batzuek ez dituzte errespetatzen, eta sarritan aurkitzen ditugu autoak espaloia ia osorik hartzen. Traba handia egiten diete oinezkoei, eta are gehiago gurgildun aulkian edo ume aulkiarekin doazenei. Espaloiak libre lagatzea eskatzen dugu".



Arregitorren aparkalekuak

kendu dituzte: "Arregitorreko aparkalekua asfaltatu berri dute, eta oso ondo geratu da, baina ez dugu ulertzen zergatik margotu dituzten marra horiak lurrean, aparkatzea debekatzeko. Bizpahiru aparkaleku kendu dituzte, eta horrez gain, beste gune batean ere estakak jarri dituzte, beste bi aparkaleku kenduta. Kale batentzat gehiegizkoa iruditzi zaigu".



Txalo bat Pitsintxuri, poesiaren eguneko ekitaldiagatik:

"Zein hunkigarria izan zen Pitsintxukoek antolatutako *Poesia zeu zara* saioa. Herriko lau artista eta kulturzaleren parte-hartzea, txalogarria. 45 urte bete ditu Pitsintxuk eta laster erretiroa hartzekoak dira Izaskun eta Mari Jose ahizpak. Azken momentura arte ilusioz eta mimoz jardun dira herrigintzan lanean. Mila-mila esker urte guzti hauetan egindako lanagatik. Zorionak, bikote".



Osakidetzako azpikontrataturako garbitzaileek manifestazioa egin dute Mendaron

Osakidetzako azpikontrataturako garbitzaileek greban jarraitzen dute, eta eragina nabarmena da anbulatorio zein ospitaleetan. Eguaztanean manifestazioa egin zuten Mendaron, Herriko Enparantzatik ospitaleraino. 2018tik hitzarmena berritu gabe daude langileak, eta epe horretan hainbat bilera egin badituzte ere, garbitzaileen lan gatazka oraindik ez dutela desblokeatu adierazi dute sindikatuek. Atzo beste bilera bat egitekoak ziren Lakuan.



Egokitzapenen garrantziari buruzko hitzaldia antolatu du Dislegik, hilaren 20rako

Debabarreneko dislexia elkarteak antolatuta, egokitzapenen garrantziari buruzko hitzaldia emango du Iker Floresek apirilaren 20an, Elgoibarko Kultur Etxean. Lehen Hezkuntzan diplomatua eta Psikopedagogian lizentziatua da Flores. Entzumen eta Lengoaian aditua, masterra ere badauka

ikasketa zailtasunen alorrean eta irakaslea da Hezkuntza Premia Berezetian. Besteak beste, lege aldetik premia bereziko ikasleen egoeraz hitz egingo du, eta hartzen diren neurriez eta hartu beharko lirakeenez ere bai. Hitzaldia hezkuntza alorreko adituei zuzenduta dago. 17:00etan izango da.

33 hegazti espezie ikusi edo entzun dituzte hegaztiak ezagutzeko eta txori habiak jartzeko irteeran



Txori habiak jartzeko eta hegaztiak ezagutzeko irteera egin zuten zapatuan, Morkaikok, Atxutxiamaikak eta Baso Biziak elkarteak, Udalaren laguntzaz antolatuta, eta 50 bat lagunek hartu zuten parte. Asier Sarasua Aranberri (Eibar, 1969) adituak eman zizkien txoriei buruzko argibideak, eta ariketa didaktikoak ere egin zituzten, entzundako txorien espezieak identifikatzeko. 33 izan ziren guztira: Basahatea, Uroiloa, Sai

arrea, Miru beltza, Miru gorria, Zapelata, Etxe-usoa, Usapal turkiarra, Okil berdea, Belabeltza, Eskinosoa, Mika, Enara arrunta, Uhalde-enara, Buztanikara zuria, Buztanikara horia, Ur-zozoa, Txinbo kaskabeltza, Txio arrunta, Erregetxo bekainzuria, Kaskabeltz handia, Pinu-kaskabeltza, Amilotx urdina, Txepetxa, Buztangorri iluna, Txantxangorria, Zozoa, Birigarroa, Etxe-txolarrea, Kardantxiloa, Txirriskila eta Txonta.

'Argiaren miraria' Garagartzako eliz-parrokian

Kristau-erlijioan, Deikundea ospatzen dute martxoaren 25ean, Gabriel aingeruak Mariari Jesusen jaiotza iragarri zioneko momentua, eta misterio hori irudikatzen duen garai bateko aparejadoreek arkitektura baliatu izan zuten zenbaitetan. Hemen gertuan, San Juan de Ortegako (Burgos, Espainia) San Nikolas Bariko elizakoa da adibide bat. Bi ekinozioetan, eguzki-izpi batek Deikundearen kapitela argitzen du arratsaldeko ordu jakin batean. Eta Mendaroko Garagartzako eliz-parrokian gauza bera gertatzen dela ikusi dute. Hala, zapatuan, ospatu egin zuten. Baina, zapatuan bizi izan zutena azaltzeko, urtebete egin behar da atzera.

Iaz, martxoaren 25a baino egun batzuk aurretik parrokiako eliztar batzuek jabetu ziren aldareko horma-hobiko gurutzea argiztaturik zegoela, argi naturalez, eta hain iruditu zitzaizkien ederra, argazkia egin ziotela. Parrokiako atarian, ezkerrean dagoen leihoatik sartzen zen argia, fatxadako simetria hausten duen leihoatik, eta zuzen-zuzenean argitzen zuen aldarearen atzeko horma-hobia, gaur Jesukristo gurutziltzatuaren irudia dagoen lekua. Sarri erreparatua zioten leiho horri eta bere funtzioa zuela jabetu ziren hala. Iazko, martxoaren 25ean, hileta-elizkizun batean eta jauna eman aurretik, 18:30ak aldera, zer gertatzera zihoan adierazi zien Txomin Zabaleta parrokoak hiletara bildutakoei. Azaldu zien ziurrenik ez zela kasualitatea aldareko horma-hobia eguzki-izpiz argizatzea, Deikunde eguna zelako, eta lehen, gaur Jesukristoren irudia dagoen lekuan, Ama Birjinaren irudia egon zelako. "2022an, udaberriko ekinozioan deskubritu genuen gertatzen zena, baina nahi izan genuen irailan, udazkeneko ekinozioan, berriro gertatzen zela egiaztatzea. Eta iazko irailan egiaztatu genuen eguzkiak, negurako bidean, berriz ere

Garagartzako horma-hobia agurtzen duela", azaldu du Zabaletak. Geroztik, leiho hori noiz eraikia zen argitu nahian ari dira eliztarrek.

Historialariek ez dute uste leihoa eliza eraiki zutenekoan izan daitekeenik, baina ez dute baztertu Deikundearen misterio hori gogoratzen egin izana leihoa norbaitek gerora. Eliztarrek ez dute zalantzarik. Adinekoek gogoratzen dute gaur Jesukristo gurutziltzatu dagoen horma-hobi horretan garai batean, 50eko hamarkada hasiera aldera arte, Ama Birjinaren irudia zegoela. Angel Bazterretxearen aurreko kapilauak kendu ei zuen Ama Birjina handik, eta ezkerrean jarri zuen, haren lekuan, horma-hobian, gurutzea jartzeko.

Rosa Mari Arriolak oroitu du parrokiaren berritzeko obrak egin zituztenean kendu zituztela elizatik santu asko eta orduan eztabaida handia egon zela, batzuek



Ama Birjina nabarmentzearen alde egin zutelako eta beste batzuek, Jesukristo nabarmentzearen alde. Ordura arte, baina, Ama Birjinari zegokion aldare nagusiko horma-hobia, eta horregatik, zapatuan bere lehengo lekura itzuli zuten, "eliztarrek jositako arropa berria jantzita". "18:00etan elkartu ginen elizan, eta Bezperak errezatu ostean, 18:35ak aldera, patxadaz gozatu genuen ikuskizunaz. Ondoren montxorra egin genuen", azaldu du Zabaletak. "Nagusienek esan digute beraiek bazekitela gurutzera eguzkia iristen zela noizik behin. Noizbait ahaztu zen Mendaron gertaera horren zergatia eta helburua. Aurtengo ospakizunarekin, hasiera eman diogu urtero martxoaren 25ean egingo dugun otoitzaldiari. Opari eder hori utzi ziguten gure arbasoak omendu eta natura eta gizakiok elkarrekin edertasuna sortzeko dohaiaz gozatzu".

Altzola "hiltzen" ari dela salatu du Podemosek

Elkarrekin Podemosen Elgoibarrerako alkategai Evaristo Rodriguez eta ahaldun nagusi izateko hautagai Miren Echeveste Altzolan izan dira, eta auzoa hiltzen ari dela salatu dute. "EAJK eta PSEk bultzatutako" bi abiaduratan doan Gipuzkoaren eredia salatu dute, eta Altzola jarri dute adibide. "Erakundeek abandonatuta bizi dira Altzolako bizilagunak, eta zerbitzu publikoen gabezia salatu nahi dugu", esan du Echevestek. Altzola Elgoibarko auzo bat gehiago dela gogoratu du Rodriguezek, eta herriguneari bizi direnen eskubide eta berberak dituztela gaineratu du.



Mendaroko EHBilduk inkesta bat zabaldu du, herritarrek datozen urteetarako dituzten lehentasunak ezagutzeko

Mendaroarren lehentasunak zeintzuk diren jakiteko inkesta zabaldu du Mendaroko EHBilduk apirilaren 14ra arte. 23 proiektu nagusi zehaztu dituzte eta herritarrei garrantzitsuenak iruditzen zaizkien 10ak aukeratzeko dituzte.

Inkesta betetzeko bi bide nagusi aurreikusi

dituzte EH Bildun. Batetik, whatsapp eta email bidez Mendaroko herritarrei zabalduko dieten online inkesta bat baliatuko dute. Bestalde, mahai bat jarriko dute Herriko Enparantzaren apirilaren 14an. Informazio guztia: ehbildumendaro.wordpress.com/

Elgoibarko EHBilduk aurkeztu ditu Udal Hauteskundeetarako lehenengo hamar hautagaien izenak



Maiatzaren 28an egingo dituzte Udal Hauteskundeak, eta alderdiak hasi dira beraien zerrendak aurkezten. EHBilduk esana zeukan Aitziber Aranberri izango dela beraien alkategaia, eta orain zerrendako beste lehenengo bederatzia hautagaien izenak eman ditu: Iñaki Lasarobaster

Badiola, Eneritz Azkue Basurko, Jorge Hernando Gaona, Nagore Cid Alzibar, Jose Luis Mulas Aljonilla, Jone Olaizola Oñederra, Andrea Etxaniz Arregi, Fermin Lazkano Perez eta Joseba Osoro Iturbe. Apirilaren 22an aurkeztuko dute zerrenda osoa jendaurrean, 13:00etan, Kalegoen plazan.

Anbulatorio berriaz esandakoari erantzun diote EHBilduk eta 24/7 plataformak

Merkatu plaza dagoen lekuan anbulatorio berria egiteko sinatu duten akordioaren berri eman zuten joan zen astean Jaurilaritzako osasun agintariek eta Elgoibarko Udaleko arduradunek, eta horren harira, iritzia plazaratu dute Elgoibarko EH Bilduk eta 24/7 plataformak.

EHBilduk esan du adreiluek ez dutela zerbitzua ordezkatzeko. Salatu du anbulatorioko erabiltzaileek urteak daramatzatela "instalazioak desegokiak" direla salatzen, baina osasun zerbitzuetan instalazioak garrantzitsuak izanik ere, horietan eskaintzen diren zerbitzuak are garrantzitsuagoak direla diote. Era berean, elgoibartarrek azken urteetan jasan duten "zerbitzu murrizketa" lotsagabetzat jo du koalizioak: "Larrialdietarako Etengabeko Arreta Gunea itxi egin ziguten eta 24 orduz irekita egon beharrean, 17:00etatik aurrera ez dago zerbitzurik. Eta horri gehitu behar zaio asteburuetan ez dagoela zerbitzurik". Mobilizazioei bi urtez "entzungorrena" egin eta EAJ-k murrizketen politikari eutsi diola esan dute EH Bildutik, "baina hauteskundeak hurbil direnean anbulatorio berria egingo dela iragarri: elektoralismoa". Elgoibartarrek kendutako zerbitzua berreskuratzeko eskatu duten arren, Osakidetza eta EAJ ez dutela erantzun nahi diote. EHBildutik zerbitzua berreskuratzeko ahal duten guztia egingo dutela agindu dute.

24/7 plataformatik, bestalde esan dute Sagarduik "berriz ere" errespetua galdu diela osasun zerbitzuak lehengoratzeko eskatzen duten



elgoibartarrei. Adierazi dute Sagardui ez zela Elgoibarrera etorri anbulatorioko zerbitzuei buruz hitz egitera, ezta ere, "berak hala esan zuen arren", zergatik oraindik ez den berreskuratu pandemia aurreko ordutegia azaltzera: "Elgoibarrera etorri zen argazki bat ateratzera eta hauteskunde kanpainako ekitaldi baten bidez Maialen Gurrutxaga EAJko hautagaiari babes ematera". Plataformakoen ustez, anbulatorio berriarena "idea soil" bat besterik ez da, "Pilarreko egoitzarena bezala": "Gutxienez 15 urte dira alderdi hori Pilarren egoitza berri baten eraikuntza herritarrei saltzen hasi zenetik, eta oraindik ez dira obrak hasi".



Mari Jose Telleria izango da PSE-EEren alkategaia, Mendaron

PSE-EEren Mendaroko alkatetzarako hautagaia izango da bigarrenkoz Mari Jose Telleria (Eibar, 1971), maiatzaren 28ko hurrengo udal-hauteskundeetan. Amaitzean den legegintzaldian egin duen lanaren balorazio "oso positiboa" egin ostean hartu dutela Telleriaren hautagaitzaren aldeko erabakia jakinarazi dute PSE-EEtik. Mari Jose Telleria Mendaroko talde municipal sozialistaren bozeramailea izateaz gainera, Gipuzkoako Foru Aldundiko Kultura, Lankidetz, Gazteria eta Kirol Departamentuko diputatua ere bada. Ikasketei dagokionez, kazetaritzan lizentziatua eta Udal Erakundearen Kudeaketan (UPV-EHU) eta Tokiko Garapenean eta Enpleguan (Uned) graduondokoak ere ditu eginda.



Fotoiosu_photography

DENA PREST KILIMON TRAILERAKO

450 korrikalari espero dituzte bihar Mendaron jokatu den Kilimon Trail mendi lasterketan. Zailtasun ezberdineko bi lasterketa izango dira: luzea, 23 kilometrokoa, eta motza, 11koa, eta Euskal Herriko Kopako proba puntuagarriak izango dira biak, bai eta Euskal Mendizale Federazioko txapelketa ere. Mendaroko Txirrindulari Elkarteak eta Lizarpe Mendi Kluba dira antolatzaileak eta herri oso bat jardungo da laguntzen.

✍️ 📷 Ainara Argoitia / 📷 FotoIosu Photography

Kilimon Trail mendiko lasterketa jokatu dute bihar Mendaron. Hamaikagarren edizioa izango da aurtengoa, eta

bigarren urtez, Euskal Herriko Koparako proba puntuagarria izango da, eta aldi berean, EMF Euskal Mendi Federazioaren txapelketa ere bai. Guztira, 450 korrikalari daude izena emanda: 300 lasterketa luzerako, eta 150, motzerako; tartean izen handiko asko. Urtarrilaren 10ean zabaldu zuten izena emateko epea antolatzaileek, eta ordu gutxiren buruan banatu zituzten luzerako dortsal guztiak. Ikusmin handia dago beraz biharko, eta parte-hartzaile kopurua bera eta korrikalarien maila kontuan hartuta, ikuskizuna ziurtatuta dago. Gaur gaurkoz, Maite Maiora mendarorak du denborarik onena emakumezkoetan, luzean: 2:16:14. 2017. urtean ezarri zuen errekorra Maiorak. Gizeozkoetan, berriz, Bartłomiej Przedwojewski poloniarak egin du gaur artekoan denborarik onena, 2018an: 1:54:43.

16:00etan abiatuko dira lasterketa motza jokatzekoa dutenak, eta bost minutu geroago, luzerako izena emanda daudenak. Ibilbide motza 11 kilometrokoa da, eta 600 metroko desnibel positiboa du. Helmugakoaz gain, bi anoa postu izango dituzte bidean korrikalariak: bata, bosgarren kilometroan, Lizarpen, eta bestea, 7,5. kilometroan, Saroben. Bigarren

16:00etan abiatuko dira Herriko Enparantzatik lasterketa motzekoak eta bost minutu geroago irtengo dira luzekoak

anoa postuan ura bakarrik banatuko dute. Proba luzeak, berriz, 23 kilometro izango ditu eta 1.650 metroko desnibel positiboa gainditu beharko dute korrikalariak. Bost anoa postu izango dituzte luzekoak: Barrenkortan (4.km), Madarixan (8.km), Mutxubarrenen (12,5.km), Otarren (15.km) eta Gaintxiarian (18. km) eta helmugakoa. Bost anoa postuetara autoz iritsi daiteke, nahiz antolakuntzakoez nahiago duten ahal den gutxien hartzea kotxea. Edonola ere, lehenengo lau anoa postuetako batera autoz joatea erabakitzen duenak aukera izango du, ondo bidean, proba luzeko lehen hiru korrikalariak helmugaratzen ikusteko; Gaintxiaria joaten denak, ordea, nekez.

Mendaroko Txirrindulari Elkarte eta Lizarpe Mendi Kluba dira antolatzaileak, baina babesle eta laguntzaile zerrenda luzea dute, eta batez ere, boluntario lanean jardungo den herri oso baten laguntza ezinbestekoa. Dena dago lotuta, eguraldi ona izan ezik. Eguraldi iragarleek euria emanda dute biharko, eta zailtasun hori gehitu dakieke korrikalariari, baina zailduak dira denak ere.

PUNTA-PUNTAKO LASTERKARIAK

Proba luzerako izena emanda daudenen artean, izen handiko korrikalariak daude, tartean egungo Euskal Herriko txapelduna: Gontzal Murgoitio. Baina gehiago dira begiz jo beharrekoak, hona horietako batzuk: Imanol Goñi eta Hassan Ait iazko Sorginen Lasterketan bigarren eta hirugarren postuak eskuratu zituztenak eta Mendaron ere ezagunak direnak, Aitor Zunzunegi Euskal Herriko Kopan lider dena, Javi Goitia iazko Kilimon Trail lasterketako irabazlea, Ibai Larrea, Alain Santamaria, Oier Ariznabarreta, Aitor Ajuria, Iñigo Alzola, Hodei Samaniego, Ibai Makazaga eta Irazu Aranburu.

Kanpotik datozenen artean, aipatzekoak dira, era berean, iaz errekorra ontzeko asmoz etorri zen Anders Kjaerevik, jaitsieretan munduko onenen artean aipatzen dutena, eta Pere Rullan mallorcarra.


Emakumezkoetan, Maite Maiora mendaroarra eta Mayi Mujika elgoibartarra, gure bi ordezkariak, aipatu behar dira beste inor baino lehen, baina haiekin batera lehiarako prest etorriko dira Malen Osa, Ainara Uribarri, Oihana Zubillaga (Euskal Herriko Kopan hirugarren postuan dagoena, momentuan), Lide Urrestarazu, Jone Fuente, Sara Peña, eta Garazi Sampedro, besteak beste.



ELGOIBAR KORRIKA

✍️👤 Ainhoa Andonegi

Elgoibar Ikastolak antolatuta, Jose Gurrutxaga Krosa jokatu zuten domekan, herriko kaleetan. Eguraldia goibel esnatu zen, eta lurra bustita, baina azkenerako eguzkia ere batu zen korrika ikuskizunera. LH1etik aurrerako neska-mutilek hartu zuten parte, hamalau lasterketatan banatuta. 795 lagunek eman zuten aurpegia euskararen alde. Argazki gehiago eta bideoa: barren.eus



Haizeak harrotuta Debabarreanean

dkt
Debabarreko
Komunikazio
Taldea

Green Capital Energy enpresak Karakate-Irukurtzeta gainean parke eolikoa egiteko proiektua aurkeztu du, eta horrekin batera, orain dela 20 urteko mamuak berpiztu dira Elgoibarren eta Soraluzen. Baina horrez gain, Debabarreneko beste mendi batzuk ere parke eolikoak jartzeko leku optimo gisa izendatu dituzte, eta horrek guztiak haizeak harrotu ditu Debabarrenean. Orriotan aurkituko duzue Debabarrenerako parke eolikoari buruzko informazioa.



Eolikoetarako gune optimoak

SORALUZEN, EIBARREN, MENDARON, DEBAN, ITZIARREN ETA MUTRIKUN DAUDE

Eusko Jaurlaritzak Euskadiko Energia Berriztagarrien Lurralde Plan Sektoriala (LPS) ari da tramitatzen. Hasierako dokumentua idatzita eta ikusgai dago, Eusko Jaurlaritzaren euskadi.eus atarian.

Energiaren Plan Sektorialak zazpi energia berriztagarri ditu aztergai: eguzki-energia fotovoltaikoa, eguzki-energia termikoa, energia eolikoa, energia ozeanikoa, biomasaren energia, energia geotermikoa eta energia mini-hidraulikoa. Besteak beste, energia mota horiek sortzeko eta lortzeko Euskal Autonomia Erkidegoko eremu optimoak markatzen ditu eta aproposak ez diren eremuak baztertu.

Plan Sektorialaren tramitazio prozesuan erakundeek, elkarteek, eragileek... zuzenketak zein proposamenak egin dituzte, beraz, litekeena da aldaketak izatea behin betiko LPS-ak. Eusko Jaurlaritzak udarako nahi du onartu Energia Berriztagarrien LPSa eta behin betiko plana hura izango da.

%21etik %16,1 eolikoetatik

Eusko Jaurlaritzaren hasierako LPSaren arabera, 2030erako, Gipuzkoa, Araba eta Bizkaian kontsumitzen den energiaren %21 iturri berriztagarrietatik sortzea

lortu nahi dute, %16 bertan sortuta eta %5 kanpotik ekarrita.

Bertan sortutako energia berriztagarriari dagokionez, berriz, energia eolikoaren aldeko apustua egiten du Jaurlaritzak. Gaur egun, Gipuzkoa, Araba eta Bizkaian, 153 MW produzitzen dira dorre eoliko bidez eta helburua da 783 MW produzitzea. Hau da, zazpi aldiz biderkatzen du zentral eoliko bidez ekoitzi nahi den energia berriztagarri kopurua.

Zuzenean aplikatzekoak

Hori ahalbidetu eta bultzatzeko, Energia Berriztagarrien LPSaren aurrerapenak honakoa dio: "Haize-aprobatxamenduari lotutako eskala handiko ekoizpeneko energia berriztagarriko instalazioak 1. mailako eremu optimo garbiak eta 2. mailako eremu optimo garbiak izenekoetan ezartzea erabilera edo jarduera onargarri-

tzat jotzen da, Lurralde Plan Sektorial hau indarrean sartzen denetik zuzenean aplikatzeko, eta ez da beharrezkoa izango inolako hirigintza-plangintzaren bidez garatzea, lurzoruaren sailkapena eta kalifikazioa edozein izanik ere; hala ere, aplikagarri den sektore-araudiaren arabera, beharrezkoak diren gainerako baime-nak, lizentziak eta onarpenak beharko dira".

Gune optimoei dagokienez, lehen mailakoak dira urtean 3.350 ordu funtzionatzeko ahalmena izango luketen lekuak; bigarren mailakoetan, berriz, urtean 2.650 ordu baino gehiagoan egon ahalko lirakeke martxan dorre eolikoak.

Debabarrean, zortzi

LPSak, 33 eremutan, 139 lerrokada bereizi ditu zentral eolikoak egiteko gune optimo modura. Gipuzkoa, Araba eta Bizkaiko 33 esparru horietatik zortzi Debabarrenean daude, guztiak ere mendietan.

Soraluze-Elgoibar

Debabarrean, oraingoz, zentral eoliko bat eraikitzeke eskaera bakarra dago aurkeztuta. Green Capital enpresak (Capital Energy multinazionala) aurkeztu zuen

**Berriztagarrien
LPSaren aurrerapenak
zortzi gune optimo
bereizi ditu
Debabarrean**

Argitaratzailea: Debabarreneko Komunikazio Taldea

Erredakzioa: Ainhoa Andonegi, Ekhi Belar, Dorleta Vidal, Ubane Madera, Izaro Aulestiarte

Diseinua eta maketazioa: Ekhi Belar

Azaleko irudia: Pexels

Tirada: 18.425 ale

dkt
Debabarreko
Komunikazio
Taldea



Karakate. Argazkia: Egoitz Unamuno.

egitasmoa Soraluzeko zein Elgoibarko udaletan, 2022ko otsailean.

Aurreproiektuaren arabera, bi aerosorgailu ezarriko lituzkete Karakatetik Gizaburuagara bitartean. Dorre bakoitza 101 metro altu izango litzateke eta barruan, eskailerak, igogailua eta plataformak izango lituzke. Hegal bakoitza, berriz, 77 metro luze izango litzateke. Beraz, hegal eta guzti, aerosorgailu bakoitzak 180 metro inguruko garaiera izango luke.

Konparatze aldera, dorreak Soraluzeko elizdorrearen garaieraren halako lau neurtuko luke, Elgoibarko Mintxeta kirolgunea baino luzeagoa izango litzateke edo Bilboko Iberdrola dorrea baino handiagoa (165 metro ditu hark).

Dorreen oinarriek, berriz, 26 metroko diametroa izango luke eta hiru metroko sakonera, lurpean. Potentziari dagokionez, aerosorgailu bakoitzak, batz bestea, 4.800 kw-eko potentzia sortuko luke.

Elgoibarko azpiestaziora

Aurreproiektuan zehazten dutenez, zentralak sortzen duen energia Elgoibarko azpiestazio elektrikora eroango lukete, Azkueko zentralera (jabea Iberdrola da), handik sare orokorrera konektatzeko. Energia, lurpean sartutako kableen bitartez bideratuko

lukete Elgoibarko azpiestaziora, 4,79 kilometroko ibilbidean zehar.

Proiektuak, guztira, 10.762.915 euroko aurrekontua izango luke.

Eusko Jaurlaritzaren Garapen Ekonomiko eta Jasangarritasunerako Departamenduak abuztuaren 2an jarri zuen ikusgai Green Capital Development 135 SLU enpresak Karakateko parke eolikoa eraikitzeko aurkeztu duen hasierako ingurumen txostena.

"Uztargarria eta moderatua"

Bertan, enpresak zehazten du bere ikuspuntutik proiektuak zer nolako inpaktua eragingo lukeen ingurumenean eta inpaktu hori minimizatzen zein neurri hartuko lituzkeen. Enpresaren iritziz, proiektuak ingurumenean izango lukeen eragina "uztargarria eta moderatua" izango litzateke eta ondorioz, ez du ikusten arrazoirik proiektua geldiarazteko.

Ingurumen txostena argitaratu arte, Green Capitalek ezagutarazi gabe zituen proiektuaren gaineko hainbat informazio; esaterako, ingurumen txostenean argitu zuen nola pentsatzen dituzten garraiatzea zentral eolikoa



Jaungoikomendi. Argazkia: Xangarin (mendiak.eus)



Kalamua mendian Markina-Xemeini dagokion gunea ezarri dute eolikoak jartzeko guneko optimo bezala. Argazkia: Ekhi Belar.

eraikitzeke pieza erraldoiak: Elosutik garraiatuko lituzkete, horretarako, mendi gainean zehar 5 metro zabal eta 8 kilometro pasatxo lituzkeen errepidea eraikitzeke, aerosorgailuak ezarriko lituzketen kokalekuraino. Horrekin batera, aurreproiektuan aipatzen ez zuten "dorre meteorologikoa" eraikitzeke asmoa ere azaltzen da ingurumen txostenean. Hirugarren dorre hori 101 metro garai izango litzateke eta txostenean diotenez, eraikitzeke, "gutxienez" 520 m²-ko plataforma eraiki behar luke. Bestalde, txostenak dorre eolikoak muntatzeko era-

biltzea aurreikusten duten espazioa ere zehaztu zuten: 3.000 m².

Egitasmoaren prozedurari dagokionez, berriz, Green Capitaletik esan dute espedientea tramitatzen segitzen dutela eta zaila dela behin betiko proiektuaren gaineko data zehatzik ematea.

Beste kokagune bat

Zentral eoliko bat eraikitzeke egitasmoa aurkeztuta izan arren, Eusko Jaurlaritzaren LPSaren aurrerapenaren arabera, Soraluze-Bergara inguruan, eremu bakarra dago kontsideratuta aerosorgai-

luak jartzeko eremu optimo modura: Txurruka gaineko Koskorreta-Ozeta Irukurutzetatik Osintxu aldera jaisten den hegi handian dago kokatuta esparrua, Soraluzen Atsedentxaboleta esparru ingurua modura ezaguna den gunea. 625 bat metroko esparrua.

Karakate-Irukurtzeta lerrokadura, berriz, guneko baztertu modura azaltzen da LPSaren aurrerapenean, baina aldi berean, lerrokadura hori ez da osorik baztertzen.

Eibarren, bi

Bestalde, Soraluzen ez ezik, berriztagarrien LPSak eolikotarako beste zazpi kokagune optimo bereizi ditu Debabarrenean, bigarren mailako guneko optimoak, guztiak ere.

Horietako bi Eibarren edo Eibar inguruan daude: bata, Akondian (Arrikurutz) eta bestea, Markina-Xemeinekin muga egiten duen Kalamua mendian. Bien artean, kilometro eta erdiko luzera hartuko lukete.

Mendaro-Deba-Itziar, gehien

Itziar-Deba-Mendaro eremuan daude, berriz, guneko optimo kopururik handienak identifikatuta, bost: Urkamendi-Arriolak (Itziar, Deba), Otaerre-Larraskanda (Deba, Mendaro, Azkoitia. Izarraitzen); Otaerre (Txoriskita)-Elordi-Urkullu (Mendaro, Deba. Izarraitzen) eta Andutz-Txobillar (Itziar, Deba). Guztira, lau kilometro pasa.

Mutrikun, sei guneko lerratuta

Azkenik, Mutrikun beste lerrokada bat markatu dute guneko optimo modura. Ez da lerrokada jarraia, baizik eta guztira, lau kilometro pasako luzera hartuko luketen sei guneko daude markatuta; bat izan ezik gainerako guztiak Jaungoikomendi eremuan daude kokatuta.

Eragile politikoaren iritzia

ZER IRUDITZEN ZAIZUE DEBABARRENEAN PARKE EOLIKOAK JARTZEA?

Ordezkaritza politikoen zeresana izango dute Energia Berriztagarri-en Lurralde Plan Sektorialaren tramitazioan eta, horregatik, gaur egun Debabarrenean ordezkaritza duten alderdi, plataforma edota eragileekin egon nahi izan dugu gaiaren gainean euren iritzia zein den jakiteko. PP alderdiaren kasuan, ostera, Ermuako PP-ren izenean erantzun diote geure galderari.



Krisi energetiko batean murgilduta gaude. Erregai fosiletan errotutako gure energia-sistemaren ondorioz pairatzen ari garen klima-aldaketa areagotzen ari da.

Arazo honi aurre egiteko, tresna nagusia trantsizio energetikoa da, hau da, erregai fosiletan errotutako sistema energetiko bate-

tik emisio gutxiko edo karbono-emisiorik gabeko batera aldatzea, iturri berriztagarrietan oinarrituta.

Denok bat gatzon energia berriztagarrien aldeko apustua egin behar dela, baina modu zuhur, kontrolatu eta antolatuan, horrek ez baitu esan nahi horren kostua hutsa denik. Energia eolikoa batzuentzat elektrizitatea sortzeko modurik garbiena, berriztagarria eta kutsadurarik gabekoa bada ere, ezin dugu ahaztu ingurumenean eta biodibertsitatean duen eragin ezkorra.

Horregatik guztiagatik, gure eskualdean parke eoliko bat jartzeko aukeraren aurrean, ezer baino lehen, azterketa zorrotz bat egin beharko genuke, irizpide teknikoak, ingurumenekoak, sozialak eta ekonomikoak kontuan hartuta.

Baina ez dezagun ahaztu planetaren etorkizuna gure esku dagoela, eta, beraz, has gaitezen kontsumo-ohiturak aldatzen: energia-kontsumoa murriztuz, kontsumo iraunkorragoa sustatuz eta ditugun baliabideak modu eraginkorrean erabiliz.

ehbildu

Garrantzitsua da parke eolikoaren eraginaz hitz egin aurretik larrialdi klimatikoaz eta energiaren krisiaz hitz egitea. Alde batetik, erregai fosilekiko dugun menpekotasuna dago, eta bestetik, honek larrialdi klimatikoan duen eragina. Beraz, ezinbestekoa da erabat lotuta dauden bi gaiak heltzea eta Euskal Herrian ere trantsizio ener-

getikoa lehenasunez kitzat hartzea. Horretarako, behar dugun energia kontsumoa zehaztuko duen eta hau lortzeko oinarriak jarriko dituen Energia Estrategia diseinatu behar da. Beraz, Lurralde planifikazioak eskutik behar du energia berriztagarrietan oinarritutako planifikazio energetiko bat. Energia berriztagarrien hedapen ordenatu baterako planifikazioa da behar duguna, eta hau da LPS berriak duen gabezia nagusia. Gure ustez, autosufizientzia ahalik eta eskalarik txikienetan bilatu behar da, eta horlortu ezin dena goragoko eskaletan

bilatu, beti maila lokaleko autosufizientzia osatzeko helburuarekin. Eta betiere aintzat hartuz arrazoi ezberdinengatik salbuetsi eta babestu beharreko eremuak. Trantsizio energetikoak interes publikoari erantzun behar dio, eta gure ustez, ezinbestez aipatutako baldintzei. Beraz, parke eolikoaren beharra eta kokapenaz hitz egin aurretik, ezinbestekoa da Euskal Herrian dugun Energia beharra aztertzea eta honi bide emateko herritarrekin batera prozesu sakonak egitea, herritarren oniritzia ezinbestekoa delako estrategia honetan.



LPS batek, izan orain arte indarrean dagoen eolikoena edo lantzen ari den berriztagarrienak, berriztagarri hori non ezin den garatu uzten du garbien; eta, garatzekotan, garatzeko balizko lekuak zehazten ditu. Planak aipatzen du balizko eremu horiek zehaztasun gehiagoz lantzen dituela eremu bakoitzera-ko proiektua egiten denean. Proiek-

tuak berak zehaztatuko ditu hai-zerrotak non jarriko diren eta proiektuak lurrari sortuko dizkion morrontzak. Indarrean dagoen Planaren barruan planteatzen diren parke batzuk bertan behera gertatzen ari direla ikusten ari gara, ingurumen edo arautegiak eskatzen dituen baldintza guztiak betetzea ezinezkoa gertatzen zaielako edo garapena bideragarria ez delako. Energia berriztagarriak ezinbestekotzat jotzen baditugu eta trantsizio energetikoa egin behar bada, erabakiak hartu eta neurriak ezarri behar dira, ahalik inpaktu txi-

kiena sortuko duten berriztagarriak bultzatzeko. Ezin dugu berriztagarrien alde egon eta proiektuak zehaztasunez ezagutu gabe, alarma sortzen hasi edo aurka jarri. Gure industriak ezinbestekoa du aztarnarik gabeko energia ekoiztea. Eta gure ongizatea industrian oinarrituta dago. Horrek ezinbestean berriztagarriak jartzera eraman behar gaitu. Gainontzean, berriztagarria bada ere, kanpotik ekarri beharko dugu, kanpokoek ezartzen diguten prezioan. Burujabetza bada gure helburua, energian ere, gure energia ekoizten hasi behar dugu.



Azkenaldian bizi dugun energia-krisiari areagotu egin du tokiko energia berriztagarriekiko interesa, trantsizio energetikoa gauzatzeko premia agerian utzi baitu. Baina trantsizio hori egiteko modu asko daude. Trantsizioa jasagarria izateko, plangintza beharrezkoa da, eta horretarako LPS-a tresna baliagarria izango da. Aurrerapen Doku-

mentuan, zentral eolikoak egiteko eremu egokien artean, Irureko Haitzetik Andutz tontor aldera eta Urkamenditik Arriola bitarteko kokapenak ageri dira. Geoparkea, Biotopoa, Izarraitzeko babesgunea... Balio handiko ingurua dugu, eta eraikuntza hauek sortuko luketen atzera bueltarik gabeko txikizioak kezka sortzen du. Industrialdea bertan izanik, energia-iturri berriztagarriak ustiatzeko hau bezalako eremu antropizatuak lehenetsi beharko lirakeela uste dugu, lur gehiago artifizializatu ordez. Kokapenaren eztabaidaz harago, tran-

tsizio energetikoak aldaketa sakonagoen eskutik etorri beharko luke. Emakumeen Eguneko aldarrietako bat zaintzak erdigunean kokatzea izan da. Energiak badu garrantzia zaintza horretan, eta negozio gisa kudeatzetik eskubide gisa kudeatzera pasatu beharra dago, herritarrek ahaldu eta energiaren jabetza berreskuratuz. Energiak herritarren benetako beharrei erantzun behar die, hazkundearen logika alde batera utzita. Energiaren erronkak aldaketa sozioekonomiko sakonak eskatzen ditu, benetan zaintza erdigunean jarri nahi bada.



Galdera batekin hasiko gara. Aldaketa klimatikoari aurre egiteko gizarte bezala, herritar bezala, zerbait ipintzeko prest al gaude? Erantzun bakarra teknologia eta natura suntsitzean oinarrituko al dugu? Debabarrenean Natura 2000 sareko naturgune babestuak eta SARE BERDEA osatzen duten ekosistemak eta galtzeko arriskuan

eta egoera zaugarrian dauden hainbat espezie dauzkagu. Bi hamarkada baino gehiago daramatzagu lurraldea aktibo finantzario gisa erabiltzen. Hortik dator administrazioaren desarautzea eta eskuhartze falta. Azken 50 urteetan zientzialariek behin eta berriro azaldu digute etengabeko hazkundea ezinezkoa dela mugak dauzkan planeta batean. Argi eta garbi jakin behar dugu mendi guzti-guztiak parke eolikoak eta zelai guztiak eguzki-panelekin beteko bagenu ere, ezingo genukeela gaur egungo energia kontsumoa mantendu.

Askoz energia gutxiago kontsumitzen ez badugu, ordezkapen hau ez da iritsiko. Nolabaiteko arrazionaltasun eta errealismoak gidatu beharko gintuzkeela uste dugu. Izan ere, hori da, eta besterik ez, berriztagarrien makroproiektuen aurkako mugimenduek eskatzen dutena: demokrazia eta subiranotasun energetikoa. Hau da, zer energia mota, zenbat eta zertarako erabakitzeko gaitasuna. Bizitza eta ekonomia birkokatzea izan daiteke irtenbidea, tokiko energia eta materialekin tokiko beharrak ase ahal izatea.



Ezin da okerrago egin. Otarre eta Atxurigain bezalako mendieta-rako proiektuak planteatzeak -kontuan izanik Izarraitz mendigunean kokatuta daudela eta urak Kilimon ibaiaren akuiferora (Mendaro) drainatzen dituztela-, erabateko ezjakintasuna eta zentzugabekeria erakusten ditu. Proiektu horiek lurpeko eremua-

ri eragingo lioketen kutsadura ondo dokumentatuta dago. Elgoibar, Deba, Itziar, Mendaro eta Mutrikuko urak elikatzen diren akuiferoa babesteak beste interes batzuen gainetik egon beharko luke. Beste proiektu batzuek, hala nola Kalamuakoak eta Karakatekoak, amorrarazi egin ditu herri-tarrak, mendi horiek gordetzen dituzten ondare-balioak hondatzearen aurka daudelako. Karakateren kasuan, Elgoibarko eta Soroluzeko udalek ezezko irmoa adierazi dute, baina proiektuak aurrera jarraitzen du, bi udalek

onartu dituzten Babes Planak gorabehera. Eusko Jaurlaritzak ez ditu berriztagarriak bultzatu, 40 urtean gasaren eta *fracking*-aren aldeko apustua egiten jardun delako soilik, eta orain gasaren eta petrolioaren lehengo oligopolio energetikoaren eskutik doa, energia berriztagarrien oligopolio berri gisa posizionatzeko, proiektuak esleituz, ingurumenean edo gizartearen suminean duten eragina gorabehera, eta udalen aurrean eta herritarren interesen aurka inposatuz. Ez, gauzak ez dira horrela egin behar.

**PSE-EE
PSOE**

Gipuzkoak kanpoarekiko mendekotasun energetiko handia du (%90) eta energia berriztagarrien presentzia ez da % 8ra ere iristen. Datu horiek kontuan hartu behar ditugu erabakiak hartzerakoan, mendekotasun energetiko handia gure eta eskualdeko enpresen kostuen igoeraren eta lehiakortasun-galeraren arrazoi bat baita, eta baita

gure herritarren erosteko ahalmena galtzearen arrazoietakoa bat ere. Lurraldeko udalerrri eta eskualde guztien trantsizio energetikoa bizkortzeko garaia da, udal askotan komunitate energetikoekin egiten ari garen bezala, baina ez da nahikoa kanpoarekiko daukagun mendekotasuna gainditzeko. Energia berriztagarrien behin betiko bultzada eraginkorrean lan egin behar dugu, eta hor energia eolikoak eta parke eolikoek aliatu izan behar dute gure lurraldean. PSEk trantsizio energetiko berde baten aldeko apustu egiten du, baina justua eta

soziala izan behar da, eta garatzen diren berriztagarrien proiektu guztiek osagai sozial hori izan dezaten lan egiten dugu. PSEk garrantzitsutzat jotzen du proiektu eolikoak gauzatzeko hauek ahalik eta zorroztasun tekniko handienarekin egitea, eta, hala, ingurumen-balioei lehenatasuna ematea, proiektu guztien ingurumen-inpaktuak modu metatuan eta sinergikoan aztertuz. Horretarako, oso garrantzitsua da Eusko Jaurlaritzak, energia berriztagarrien LAParen onarpena azkartzea. Plan horrek denbora gehiegi darama izapidetzen.



Kultura-, natura- eta paisaia-interes handiko eremu baten inguruan hitz egiten ari gara. Baina, aldi berean, energia merkeago eta garbiagoak nahi ditugu. Dikotomia honen aurrean, Energia Berriztagarrien Lurralde Plan Sektoriala onartzea izango litzateke logikoa, eta hori Eusko Jaurlaritzari dagokio | Ermuko PP

"Egin behar den lehenengo gauza energia kontsumoa jaiste da"

IÑIGO ANSOLA ENERGIAREN EUSKAL ERAKUNDEKO ZUZENDARIA

Iñigo Ansola Kareaga (Markina-Xemein, 1974) Euskal Energia Erakundeko (EEE) zuzendaria da. Azpimarratu du energia berriztagarriak lortzeko mota guztietako proiektuak beharko direla eta egin beharreko lehen gauza energia kontsumoa jaiste dela.

Zein da egungo egoera?

Dependentzia handia dugu. Kanpotik ekartzen dugu kontsumitzen dugun energiaren %90 eta %10 guksortzen dugu. Hemen sortutako horretatik %62 biomasa da, %21,7 bioerregaia, %4,9 eolikoa, %5,4 hidroelektrikoa eta %5,8 eguzki energia (2020 datuak dira).

Zer lortu nahi da?

2030erako kontsumitzen dugun energiaren %21 izatea berriztagarria, izan guk produzitutakoa (%16) zein kanpotik ekarritakoa (%5). Gauegun, kontsumitzen dugunaren ia %17 iturri berriztagarrietatik sortutako energia da, inportatzen ere ari garelako berriztagarrietatik sortutako energia. %21 lortzeko, gure plan estrategikokoan azaltzen da, adibidez, 783 MW jarriko dugula sektore eolikoan bitartez; gaur egun, 153 MW daude martxan. Euskadin oso energia kontsumitzaile handiak gara. Energia asko kontsumitzen

dugunez, kontsumoaren mix hori berriztagarrien aldera ehuneko bakarra aldatzeko ere, sekulako ahalegina egin behar dugu. Ez da gauza bera Extremadurako mix energetikoa aldatzea edo Euskadikoa. Gero dator hurrengo eztabaida: energia berriztagarri asko sortu behar dugu. Baina, zelan eta non?

Hori da, zelan eta non?

Ondo dago plaka fotovoltaikoekin auto-kontsumorako proiektuak sartzeara eta horretarako dirulaguntza asko banatzen ditugu; baina horrek ez du asetzen dugun premia guztia. Plakak beren teilatuetan jarrita ere, portzentaje bat lortuko dute industrietan, baina ez behar duten beste. Tamaina guztietako proiektuak behar ditugu: txikiak, ertainak, bai eta handiak ere, energia asko sortuko dutenak.

Plaka fotovoltaikoek lur eremu handiak behar dituzte. Eta eolikoak haizeak jotzen duen lekuan jarri

behar dira; gure erkidegoan, mendi tontorretan, mendi gailurretan, dago haizea. Proiektu hauek inbertsio ekonomiko handia egitea eskatzen dute, eta gutxieneko bat zaindu behar da, haizeari dagokionez. Horregatik dago interesa, baita ere, itsasoan jartzeko, han mendietan baino baliabide egokiagoak daudelako argindarra sortzeko. Baina gure itsasoak erronka zailago batzuk planteatzen ditu: plataforma kontinental sakonak ditu eta azpiegiturak flotanteak izan behar dira, baina gure itsasoak, neguan, badaki olatu ikaragarriak sortzen; gainera itsasokoa ur gazia da, eta horrek konponenteak ugertu egiten ditu. Baina hor dago baliabide oso garrantzitsua eta enpresa pribatuak sekulako apustua egiten ari dira.

Energia Berriztagarrien LPSaren aurrerapenean, zortzi gune optimo markatu dira Debabarrenean eolikoetarako. Zer lortu nahi da horrekin?

Legeak zein gunearen ezaugarriak kontuan hartuta, ikusten dira zeintzuk diren gunerik onenak parke eolikoak jartzeko. Beste kontu bat da gero enpresek gune horiek interesgarriak ikusten dituzten edo ez. Aldagai desberdinak aztertuko beharko dituzte. Adibidez, izan

"783 MW jarriko dugu sektore eolikoan bitartez, gaur egun 153 MW daude martxan"



Iñigo Ansola Kareaga. Argazkia: EEE.

daiteke gune bat oso egokia haize aldetik, baina konexioa 25 kilometrora izatea eta horrek ez egitea hain aproposa izatea. Normala den moduan, edozein parke negozio plan bat izan behar du atzetik, burutzen diren inbertsioak oso handiak direlako eta proiektu horiei etekina atera behar zaielako. Beraz, gerta daiteke LPSan egokitzeak jotzen den eremu batera inorez joatea proiektu batekin, ez delako interesgarri ikusten.

Alemanian, adibidez, autobide batzuk plaka fotovoltaikoak ezarrita daude. Hau da, gune degradatuak erabiliduzte energia produzitzeko. Halakoak hemen ezin dira egin? Denak beharko ditugu. Argi eta garbi. Aztertzen ari dira, adibidez, harrobietan eguzki energia aprobezia daitekeen, bide

bazterretako zortasun -bideak erabiltzea, urtegietan eguzki-plaka flotanteak jartzea... Ideia asko daude. Dena da aztertzea proiektuek zenbat argindar sordezaketen, inbertsioak nolabaiteko itzulera izango duen ikusteko. Guztiek dute inpaktua, eta aztertu egin behar dira.

Hemen eta han, kontrako jarrera handiak ikusten ari gara zenbait proiektukiko. Zelan baloratzen duzue hori?

"Herritarrok proiektu horiek geureganatu eta geure sentitu behar ditugu"

Ulegarria da. Argi dago parke eolikoek zein fotovoltaikoek ingurumenarekiko inpaktua dutela. Egin behar dena da parke horiek indarrean dagoen legedia, ingurumen baldintzak eta beste era batekoak betetzen dituztela bermatu. Bermatzen baldin bada hori, zalantzarik gabe, aurrera, energia ikuspegitik oso premiazkoak ditugulako. Erronka bat ere badugu: herritarrok proiektu horiek geureganatu egin behar ditugu eta geure sentitu. Gaurko teknologiak laguntzen du geureganatzeko modu desberdinak sortzen: sortzen den argindarrarekiko onuradunak izanda edo parke horretan geure jabetasuna izateko aukera izanda.

Ez da aztertu energia kontsumoa jaitsi beharra?

Egin behar den lehenengo gauza da hori: energia kontsumoa txikitzea. Zenbat eta energia gutxiago kontsumitu, orduan eta errazagoa izango da iturri berriztagarrietatik lortzea. Energia mailan politikarik eraginkorrena izango da eraginkortasun energetikoa. Produktu bat lortu energia gutxiago erabiltzen edo gure etxea berotu energia gutxiago erabiltzen. Horretara diru asko dugu zuzenduta, geroz eta energia gutxiago kontsumi dezagun etxeetan, industrian, zerbitzuetan, eta zer esanik ez, batetik bestera mugitzeko.

"Argi dugu herritarren gehiengoak ez duela proiektu hau nahi"

KARAKATE BIZIRIK PLATAFORMA

Orain dela 20 urte entzun ziren estreinakoz Karakaten parke eolikoa eraikitzeke aukerak aztertzen ari zirela, eta orduan sortu ziren Elgoibarko eta Soralezuko Karakate Bizirik plataformak, Karakate babesteko helburuarekin. 2022ko urte hasieran aktibatu zituzten berriro bi taldeak, Green Capital Energy enpresak Karakaten parke eolikoa eraikitzeke proiektua aurkeztu zuenean. Herritarrak informatu eta hainbat ekintza egin dituzte, Karakate bizirik nahi dutelako.

Karakate gainean egin nahi duten parke eolikoaren kontra bildu zarete. Zeintzuk dira proiektuaren kontra egiteko ikusi dituzuen arrazoi nagusiak?

Karakate ingurua bere osotasunean babestea da gure helburua. Izan ere, bizi garen zonalde industrializatu honetan, mendiak dira gure arnasmune bakarrik. Karakate mendi berezia da gainera inguruko herritarrontzat, dugun lotura afektiboaz gain inguruak dituen balio askotari-koengatik: geologia, ekologia, arkeologia, paisaia zein aisiaren ikuspegitik babestu beharreko eremua dela uste dugu.

Duela 20 urte egon zen Karakaten parke eolikoa egiteko beste saiakera bat, eta orduan atzera bota zuten. Zelan ikusten duzue bigarren saiakera hau?

Asko arduratu gaitu proiektua berrartzeak. 1998an izan zen lehen saiakera, eta herritarrok gelditzea lortu genuen orduan.

Orain, eskualdeko mendietan hainbat proiektu aurrera eramateko arriskua dago. Karakatez gain, Kalamua, Akondia, Txurruka gaineko Koskorreta-Ozeta, Andutz-Txobillar, Otarre-Larraskanda, Juangoikomendi, Urkamendi-Arriola ere kokagune egokitzat aurreikusten dira. Beraz, aukera hau baliatu nahi dugu, eskualdeko gainontzeko herrietan gaiarekin kezka duten biztanleak gugana gerturatu daitezten gonbitea egiteko.

Zein puntutan ikusten duzue une honetan Green Capital en-

"1998an izan zen lehen saiakera, eta herritarrok gelditzea lortu genuen orduan"

presak Karakaten jarri nahi duen parke eolikoaren proiektua?

Proiektu definitiboa egon ez arren, gure mendien kontrako faktore asko ditugu, besteak beste, Europako, Madrilgo eta Gasteizko Gobernuak mega proiektuak garatzeko onartzen ari diren erraztasunengatik. Urte askoan administrazioak ezer egin gabe egon dira eta orain dena korrika egiteko beharra dute, Europak ezarritako berriztagarrien ekoizpen kopuruetara iristeko, eta inolako egiturazko plangintzarik gabe dabilta. Ondorioz, enpresa pribatuak dira proiektuak txanpinoi moduan planteatzen ari direnak. Karakateko asmoari dagokionez, Proiektua eta Ingurumen-Inpaktuaren azterketa publikoa egiteko zain gaude, eta hauteskunde ondoen publiko egingo duten susmoa dugu.

Karakate-Hirukurutzea gaina arkeologikoki babestutako ingurunea da, baina proiektu hau



Karakate Bizirik plataformako hainbat kide.

atzera botatzeko adinako babesik ba al dauka?

Green Capital enpresak Hastapeneko Ingurumen inaktuaren txostena aurkeztu zuen abuztuan. Bi herrietako plataformek, mendi taldeen laguntzarekin, eta baita Bergara, Soraluze eta Elgoibarko udalek ere ekarpenak egin genizkion txosten horri. Guretzak badu babes nahikoa, aurreko saiakeran ere Babes Arkeologikoagatik bota zutelako proiektua atzera, baina argi dugu, nahi badute egingo dutela, interes ekonomiko handiak daudelako tartean eta Administrazioa alfonbra gorria jartzen ari delako Energiaren Lobbyei. Aurre egiten aurkituko gaituzte.

Elgoibarko eta Soraluzeko udalak proiektuaren kontra zionatu dira. Horrek lagundu dezake proiektua atzera botatzen?

Proiektuaren aurkako eta Karakate babestearen aldeko posi-

zionamendu oro da positiboa, zer esanik ez herritarren ordezkaririk diren erakundeek aho batez egiten badute. Baina badakigu azken erabakia ez dela udalena, hau da, proiektua geratzea ez dagoela erabat udalaren esku. Hala ere, gutxienez herrien posizioa argi lagatzeko balio du, hemen kontraktasun eta kezka bat dagoela erakusteko. Aldi berean, antolatu ditugun ekimenetan parte hartu izana eskertzea nahiko genieke herritarrei (Mendi Martxa, jende katea, hitzaldiak, 2.026 sinadura Elgoibarren...). Argi dugu, herritarren gehiengoak ez duela proiektu hau nahi.

Karakaten ez dituzue eolikoak nahi, baina ez zarete energia eolikoaren kontra agertu. Eolikoak zein baldintzatan onartuko zenituzkete?

Eolikoaren ezarpenak plangintza bati jarraitu beharko lioke, lurraldearen behar eta aukeren analisi arrazional batetatik abia-

"Megaproiektuak baino, proiektu herrikoiagoak bultzatu behar dira"

tuta, eta ez inprobisazioaren emaitza izan. Azken honek eraman du txanpinoiak bezala zentralak bata bestearen atzetik proiektatzera. Plan sektorial horrek aspaldi behar zuen osatua, baina momentuz zirriborroa baino ez da egin publiko. Behin betiko plana osatu arte, herritarren parte-hartze ezinbestekoarekin, planteaturiko proiektuei baimekin ez litzaiekeela eman beharko iruditzen zaigu, adibidez moratoria bat ezarriz. Eolikoak ezartzeko baldintzetan ez gara adituak, baina iruditzen zaigu zenbait irizpide batzuk kontuan hartu beharko litratekeela: inguru antropizatuei lehentasuna eman (harrobiak, industrialdeak...), nekazaritza eta abeltzantzarako balio altuko eremuak eta naturaguneak babestu... Kapitalaren akumulazioaren diren megaproiektuak beharrez eskala txikiagoko proiektu herrikoiagoak bultzatu behar direla uste dugu.

Egungo kontsumo ohitura eta kopuruari begira, zein alternatiba proposatzen duzue?

Gure taldeak ez ziren sortu alternatibak plazaratzeko, Karakate babesteko baizik. Hala ere, herritarren informatzeko hitzaldiak antolatzen gabiltza, praktikan dauden eredu eta alternatiba ezberdinen berri emanez. Izan ere, Lobbyen interesen gainetik alternatibak egon badaude.

"Trantsizio ekosozialak energia berriztagarrien inplementazio azkarra behar du"

ALAITZ AJURIAGERRA JAUZI EKOSOZIALA

Urte hasieran Jauzi Ekosoziala dinamika aurkeztu zuten, iaz egin ziren Ekotopaketetatik abiatutako ekimena. Alaitz Ajuriagerra eibartarra da dinamika horretako kideetako bat.

Nolako egitasmoa izan zen Ekotopaketak? Zergatik eman duzue pauso hau?

Ekotopaketak krisi ekosoziala eztabaidatzeko eta gaia jorrazteko helburuarekin antolatu genituen, askok mugimendu ekologista artikulatzeko eta indartzeko beharra ikusten dugulako. Asko dira tokian-tokian gai ezberdinen bueltan antolatuta dauden taldeak, izan basogintza eredia lantzen dutenak, elikadura burujabetza lantzen dituzten kontsumo talde eta nekazariak, erraustegiaren aurkako taldeak, AHTaren aurkakoak... Baina ikuspegi orokor batetik begiratuko duen mugimenduaren falta igartzen dugu, ekologismoa modu transbertsalean landuko duena eta gai sozialekin lotuko duena. Izan ere, gure egunerokoan ekologismoak arlo askotan bustitzen gaitu, nahiz eta kontziente ez izan. Borroka ekologista klasikotik haratago joan nahi dugu, eta krisi ekosoziala agenda politikoaren

erdigunean jarri. Helburu nagusia jendartera heltzea izan beharko litzateke, gai ekologikoak bizitzen ari garen krisi honetan eztabaidagai egon daitezen.

Zeintzuk dira zuen helburu nagusiak?

Esan bezala, ekologia erdigunera ekartzea eta gai sozialekin uztartzea da helburu nagusia. Ekologismoa eta krisi ekosoziala agenda sozial eta politikoaren erdigunera eramatea, alegia. Horretarako gure artean saretzea, beste gai batzuetan politizatuta eta aktibatuta dagoen jendea ekologismora hurbiltzea eta jende ez politizatua ere aktibatzea izango da erronka handiena.

Nolako trantsizio energetikoa egitea proposatzen duzue?

Trantsizio energetikoa beharrezko trantsizio ekosoziala proposatzen dugu. Horrek dituen zailtasun guz-

tiak kontuan hartuta, ikuspegi global eta orokor batetik begiratu, begirada sistemikorekin. Trantsizio ekosozialak energia berriztagarrien inplementazio azkarra behar du, baina ez edozein modutan. Irizpide eta baldintza minimo batzukez inbestekoak dira: planifikatua izan behar du, parte hartzailea eta demokratikoa. Makroproiektu berriztagarriak jartzearekin bakarrik ez dugu arazoa konponduko. Egun trantsizio energetikoa korporazio handiek zuzentzen dute, helburu nagusi bakarria etekin ekonomikoa ateratzea dute eta ez dago modu ordenatu eta planifikatua planteatuta. Kontsumo energetikoaren murrizketa handi batekin batera planifikatu beharko litzake horien instalazioa, eskala ezberdinetan, parte-hartze publikoarekin, inpaktuak kuantifikatuta edo aztertuta eta erreparazio eta konpentsazioak kontuan hartuta, eta horiek sor ditzaketan etekin ekonomiko eta sozialak kalteak izango direnekin elkarbanatu. Sentsazio orokorra da, erreagai fosilak ordezkatu baino mix energetikora gehitzeko planteatu direla modu inposatu batean. Bestalde, klima larrialdiaren kausa eta

"Krisialditik modu duinean ateratzeko, nola nahi dugun bizi birpentsatu behar dugu"



Jauzi Ekosoziala ekimenaren bozeramaileetako bat da Ajuriagerra.

ondorioez, biodibertsitatearen galeraz, gure eredu sozioekonomikoaren jasangarritasunaz, gure mugikortasunaz, gure kontsumo ereduaz, gure pribilegioez gutxi egiten da berba, eta klabeak dira trantsizio justu baterantz joateko. Baliabide mugatuak dituen planeta batean hazkundera oinarritutako sistema ekonomikoa ezartzea izan da hona ekarri gaituen arazoa. Energia zertarako eta norentzako galderari erantzun behar diogu alde batetik, eta gero, non eta nork sortuko duen. Denon bizitza duinak eta oinarritzko beharrak asebetetzeko, beharrezkoa da energia kuantifikatzea, eta horretarako beharrezkoak izango ditugun azpiegiturak zeintzuk izango diren kalkulatzeko, ahalik eta inpaktu txikiena dutenak bilatzea, etab

Prest gaude trantsizio horretarako?

Ez gaude prest, baina ahalegina egin behar dugu, bestela inposatu egingo zaigu. Neurri batean aldaketa baten aurrean sartuta gaude, pobretze prozesu batean murgilduta gaude, eta bizitzaren garestitzearekin batera, gure kontsumo eredu ere aldatzen hasiak gara desazkunde baterantz. Beste eredu baterako trantsizioa bideratzeko, ezinbestekoa da gizartean adostasunak bilatzea, gure burua berramatzea eta gizartearen erdigunean beste helburu batzuk jartzea. Krisialditik modu duinean ateratzeko, nola nahi dugun bizi birpentsatu behar dugu, guztiontzat beharrezkoak diren ase beharrak zeintzuk diren, ondasunak nola banatzen diren, lanak, zaintza eta denbora,

gizartean erabakiak nork eta nola hartzen dituzten...

Zer iruditzen zaizue LPSak gure mendietan parke eolikoak jartzeko egindako proposamena?

Ez ditugu LPSak aztertu, ez gara adituak horretan eta ez dugu gure eginkizun bezala hartzen. Baina iritzi bat ematearren, eta oker ez banago, LPSa ez dago bukatuta eta moldaketak izango ditu. Ziur nago planteatzen diren leku askotan ezingo direla horrelako proiektuak aurrera eramane, ezin baita soilik ekoizpena kontuan hartu, naturababesgunez gain korridore ekologikoak eta bestelako plan sektorialak ere integratu behar direlako. Bestelako eredu sozioekonomiko bat aldarrikatu nahi badugu, kontuan hartu behar ditugu zein lur erabiliko diren elikadurarako eta abeltzaintzarako, zein basogintzarako, zein lur babestu behar diren interes handiko naturguneak direlako, zein industriarako... eta agian kontsumo energetikoa murrizteko plan sektoriala ere aldarrikatu beharko dugu. Plangintza integrala aldarrikatzearen aldekoa naiz, modu ordenatuan, nahi eta behar dugun eraldaketa planteatzeko, trantsizio ekosozial baten bidean.

Debabarreneko herritarren iritzia

GAIA GERTUTIK EZAGUTZEN DUTEN ESKUALDEKO HERRITARREN BERBAK



ALAIN ULAZIA
ENERGIA BERRIZTAGARRIEN
GRADUKO IRAKASLEA EHU-N

Irudikatu 40 elefanteko talde bat Usain Bolten abidan korrika. Kuadrilla horrek duen potentzia xurgatzeko kapaz da gure super-



JUANKAR ANDRES
HEGAZTIZALEA ETA BLOGEROA

Trantsizio energetikoa premiazkoa da klima-larrialdia dela-eta, eta bat etorri behar da trantsizio ekologikoarekin. Esparru horretan, energia berriztagarriak oso garrantzitsuak izango dira epe motzean eta ertainean. Trantsizioa

kontsumoa mutur parean ikustarazten digun haizerrota erraldoi bat. Nola ikusten duzu jendez hustutako Burgos, Nafarroa eta Aragoiko mendialdeak erraldoi hauekin josi eta gero honantz argindar kable potolo bat botatzea? Edo eskola aurkezpen batean ume batek esan zidana: "Ba! Zetako errota horrek, Espaini aldian zentral nuklear batzuk ipini eta lixto!". Aurrezpen energetiko nabarmena (adb. %50 2050rako) eta erabateko dekarbonizazioa premisatzat, dauden parkeak aprobetxatuta haizerrota modernoagoak ipintzeko, garraioa kolektibizatuta,

eredugarria izan behar da, bai denboran bai forman, eta hura jasangarria dela bermatzeko, erabakigarria da "non" eta "noiz" aldaeren gainean hausnarketa egitea. Eolikoek garapenak errespetatu behar ditu ondare naturala eta bioaniztasuna, balio ekologiko handia duten espazioetatik kanpo geratu behar dira, eta jada degradatuta eta antropizatuta dauden inguruetan kokatu. Izan ere, parke eolikoek eragin negatiboak dituzte hegaztiengan, nabarmentzekoak: hegaztiak hiltzen dira haiek jota, hegaztien habitatak suntsitzen eta aldatzen dira, eta barrera-efektuak eta desplazamenduak sortzen dituzte, besteak beste.

fotoboltaika eta eolika txiki-ertain komunitarioa erruz bultzatuta udalerrri mailan, eta mendi-goietan ura metatuko duten deposituak erabilia bateriatzat, erraldoi hauek oso gutxi beharko dira.

"Eskolan ume batek esan zidana: Ba! Zetako errota horrek, Espaini aldian zentral nuklear bat ipini eta lixto!"

Seo/BirdLifen azken txostenaren arabera, 6 eta 18 hegazti miloi inguru hiltzen dira urtero parke eolikoetan. Nik neuk ikusi dut Oiz mendian eoliko baten pala sai bati kolpea eman, eta hegao apurtzen. Topatu ditut hilda miru gorriak, arrano sugezaleak eta saguzarrak, guzti-guztiak espezie babestuak direnak.

"Nik neuk ikusi dut Oiz mendian eoliko baten pala sai bati kolpea eman, eta hegao apurtzen"



DANEL DE PRADO
ENERGIA BERRIZTAGARRIEN
INGENIARIA

Debabarreanean energia berriztagarren kuota areagotu beharra agerikoa da; hidraulikoak eta olatu-energiak osatzen dute (autokontsumoaz gain) 2,5 MWko potentzia instalatuko sorkuntza ahalmena, energia-menpekotasuna handia delarik.

Gaur egun, aerosorgailu bakar batek potentzia hau erraz hiru-

"EAEn dugun energia defizitari aurre egiteko beste formula batzuk bilatu behar ditugu"

koiztu lezake. Hala ere, paisaian duen eraginaz gain, parke eoliko baten azpiegiturak (sare elektrikoak, pista zabalak...) naturan duen eraginak munta handia du. Lautada eta mendi baxuen erliebean edo malkartsua den Debabarreanean eragin hau zeharo desberdina da. Gainera, betiko suntsitu litezke aisigune diren zenbait eremu (Kalamua eta Karakate, besteak beste).

Beraz, eskualdean eta, orokorrean, EAEn dugun energia defizitari aurre egiteko beste formula batzuk bilatu behar ditugu, arreta berezia eskainita eragin-kortasunari.



MIRIAN ARRIZABALAGA
BIOLUR

Mendietan parke eolikoak jartzeko asmoak entzutean, haiek jarri nahi diren lekura eramateko eta gero energia garraiatzeko egin behar diren apurketak etortzen zaizkit lehenik burura; fabrikaziorako beharrak batu beharko genituzke aurretik. Bigarren kolpean elikadurarekin egiten dut konparaketa, bi kasuetan kanpo dependentsia oso

"Etengabeko aldaketan bizi gara, baina norantz eta nola aldatu nahi dugu?"

handia dugu eta kontsumoan eta xahuketan, munduko batez beste-koekin alderatuta, gainera gabiltza. Koktelak osagai gehiago ditu, baina datu batekin osatuko dut: azken bi hamarkadetan aurreko mende guztietan baino lur gehiago artifizializatu da eta bailararen industrializazio maila dugu horren adibide. Instalazioak egitekotan, lehenik eremu horietatik hasi beharko genuke. Elikatu ala konektatuta bizi? Lurra, ura, haizea eta eguzkia, jana eta energia; bi behar eta eskubide, jada gizartearen zati batek ase ezin dituenak. Etengabeko aldaketan bizi gara, baina norantz eta nola aldatu nahi dugu?



DIEGO MENDOZA
DEBANATURA

Debabarreko energia berriztagarren LPSaren aurrerapena dela eta, parke eolikoek kopuru harrigarri batek mehatxatzen dituen gure mendien amaiera hori gure munduaren amaiera izango da. Ez dut exageratzen oso gai garrantzitsua dela esaten badut, beti gure askatasun, ezinegon eta ongizate amaigabearen arnas izan diren

"Horrela harrikeratu nahi dute betiko gure mendietako paisaia"

mendi horien gainean ezartzen den mehatxu horrek ezinezkoa egiten baitu oraindik ere hala izaten jarraitzea. Orain, betiko botere horiek, atzean izen berberak dituztenak, interes berberak dituztenak, oparotasun sakrosantuen izenean eta baliabideen krisi-egoera bati erantzungo dion trantsizio energetikoaren bandera faltua goratuz, aurrekoak bezain kaltegarria den industria berri batekin aurkezten dira, energia berdeak deitzen dituztenekin, baina ez direnekin. Horrela harrikeratu nahi dute betiko gure mendietako paisaia, benetan geratzen zaigun gauza bakarra.



ISA PRIETO
GEOGRAFOA

Onartu behar dut ez dudala proiektua bere osotasunean ezagutzen, ezta xehetasun teknikoak ere. Nire printzipioetan oinarrituta, ezarri ditzakegun era guztietako energia berriztagarrien alde nago, gure energia-kontsumoaren ondorioak murrizte aldera. Era berean, uste dut formula jasangarrien esparruan ezin direla aplikatu irtenbide-eredu berdinak beti, eta leku baterako egokia dena bali-

"Ezarri ditzakegun era guztietako energia berriztagarrien alde nago"

teke aproposa ez izatea beste leku baterako. Energia berriztagarrien kontsumo kooperatiba bateko kontsumitzailea naizen heinean, badakit ere argindarraren fakturaren prezioa gutxitzeko formularik onena dela baliabideak optimizatzea, bai ekonomiari bai ingurumenari erreparatuta. Izan ere, energiaren larregizko prezioaren inguruan bolo-bolo dabilen eztabaidaren aurrean, galdera bat datorkit burura: gutxiago kontsumitu nahi dugu, ala bakarrik gutxiago ordaindu?



OIER ETXEBARRÍA
GOIENER

Etorkizunean zein gizarte eta kontsumo eredu izango ditugun hausnartu beharra daukagu. Zenbat energia beharko dugun eta nola sortu nahi dugun ere erabaki behar dugu. Gaur egun kontsumitzen dugun guztia berriztagarriekin sortu ahal izango dugula pentsatzea ez da errealista. Lurralde, material eta denbora falta daukagu eta beraz, energia beharrak asko gutxitu ezean, kaosa ziurtatuta dago.

"Zenbat energia beharko dugun eta nola sortu nahi dugun erabaki behar dugu"

Goienerren, bazkide boluntario eta langileek osatutako lantalde baten hausnarketa egiten ari gara eta energia berriztagarrien proiektuek sabai ekologikoa eta lurzoru etikoa errespetatzeko oinarriak zehazten ari gara. Goienerretik baldintza hauek proposatu dira: parte-hartze handia eta kalitatezkoa eskatzea, ezaugarri buruzko erabaki-ahalmen handia bermatzea herritarrei, kaltetutako herritarren onartzea, eragindako herritarrei onura ekonomikoak ematea eta ingurumen-inpaktua aztertzea.



IOSU AIZPURU
ENERGIAREN ARLOKO
KOORDINATZAILEA MU-N

Energia berriztagarrien alde egin behar dugula ez dago dudarik. Hala ere, energia berriztagarriak instalatzerakoan gizartearen, bizigunearen eta naturan duen inpaktua baloratu behar da. Gure gizarteak biziko dituen erroka energetikoak berriztagarrien, autokontsumoaren eta efizientzia energetikoa handitzearen batura batekin lortu behar ditugu. Gure bizigunea den Debabarrenean

"Haize gune egokiena izan arren agian ezin da parke eoliko bat egin"

autokontsumoa sustatu eta energia berriztagarri eolikoa sustatzeko ikerketa eta informazio gehiago behar dugu. Erabiltzaile gisa, proiektu desberdinen lokalizazio, diseinu eta kokapenaren erabakiekiko informazio eskasa nabaritzen dugu, eta horrek mesfidantza sortzen du. Bukatzeko, ezin dugu ahaztu naturan izan dezakeen eragina. Haize gune egokiena izan arren, agian, ezin da parke eoliko bat egin. Parke eolikoak bai, baina ez nolanihi.

210.000 euroko dirulaguntza emango dio Udalak Elgoibarko Izarrari 2023an

Elgoibarko Udalak eta Elgoibarko Izarra Euskaltzaleon Topagunea elkarteak 2023rako lankidetzeta hitzarmena sinatu dute. Hitzarmenaren helburua da administrazioaren eta herri ekimenaren arteko lankidetzeta sendotzea eta elkarteak udalerrian egiten duen lana babesten eta bultzatzen jarraitzea. Ane Beitia Elgoibarko alkateak eta Iñaki Konde Elgoibarko Izarrako presidentek sinatu zuten hitzarmena, eta eurekin batera egon ziren sinadura ekitaldian, Maialen Gurrutxaga Euskara eta Haur, Nerabe eta Gazteen Sustapen arloetako zinegotzi arduraduna, eta Elgoibarko Izarrako eta Udaleko teknikariak. Aurten 210.000 euro jasoko ditu kultur elkarteak, 2023an zehar euskararen erabilera sustatzeko ekintzak eta haurrentzako aisia hezitzaileko egitasmoa finantzatzeko. Aurreko urteetan bezala,



dirulaguntza hori bi udal sailetatik bideratuko dute. Horrela, Udalaren Euskara Sailetik 130.000 euro jasoko ditu Elgoibarko Izarrak eta Haur, Nerabe eta Gazteen Sustapeneko Sailetik, berriz, 80.000 euro. Euskara elkartetik eskerrak eman dizkiote Udalari: “Ezinbestekoa da administrazioaren eta herri ekimenaren arteko elkarlana, haurrentzako aisia hezitzaileko eskaintza osatu, eta euskara eta euskal kultura gure herrian sustatu nahi baditugu”.

Jokin Lanz historialariak erromatar garaiaren azkenetan eta ondorengo mendeetan Baskoniak zuen egoeraz berba egingo du apirilaren 19an

Ilunberri Achademiak goi erdi aroari buruzko hitzaldi zikloa antolatu du, Elgoibarko Izarraren eta Udalaren laguntzaz. Erromaren krisialdi eta hondamendiaren ondorioz anabasa eta bortxa giroa nagusitu ziren garai hartan mendebaldeko inperioaren lurraldeetan. Hainbat herrik, gehienak jatorri germaniarrekoak, nahi izan zuten hark utzi zuen botere hutsunea bete, eta Euskal Herria ez zen salbuespen izan. Mende ilun haiek argitzeko asmoz, hiru hitzaldi antolatu dituzte, eta apirilaren 19an izango da lehenengoa: *Baskonia erromatar aldiaren azkenetan eta ondoko mendeetan* izenburuko hitzaldia emango du Jokin Lanz Beteluk. Antzinateko Historian doktorea (2017, UPV-EHU) eta Historia eta Ondarea Graduak irakaslea da. Gaiaren testuingurua: K.o. IV. mendean, hamarkadetako isiltasun baten ondoren, iturri idatzietan baskoien inguruko aipamenak berragertzen dira, lehen aldiz Baskonia termino aipatzen delarik. VI. mendeak



aurrera eginda Pirinioen bi aldeetara franko eta bisigodoen erresumak finkatzen direnean, baskoi berantiar hauen dinamismo politiko eta militar handia agerian geldituko da.

Apirilaren 27an Akitania-Baskonia eta franko karolingioei buruz jardungo da Iñaki Lopez de Luzuriaga, eta maiatzaren 3an, berriz, Orreagako batailari buruzko saioa emango du Xabier Irujok. Hitzaldi guztiak Aita Agirre kulturegunean izango dira, 19:00etan.

50 urteko ibilbidean bidelagun izan dituen hiru dantza talderen bisita jaso du Haritz dantza taldeak



Portugaleteko Elai Alai, Galdakaoko Andra Mari eta Donostiako Argia dantza taldeen bisita jaso zuen zapatuan Haritz Euskal Dantzari Taldeak, 50. urteurreneko ospakizunen barruan. Argiako dantzariak hasi zuten ekitaldia, eta

Elgoibarko hainbat dantzarik ere hartu zuten parte. Andra Mari taldearen txanda izan zen segidan, eta Elai Alai taldekoek itxi zuten dantzaldia. Jubilatuen Biltokian bazkaldu zuten ondoren, denek elkarrekin. Argazkiak eta bideoa: barren.eus



Unax Ansola eta Duna Santos izan dira Elgoibarko ordezkariak Aurreku Txapelketako azkenaurreko jardunaldian



Oiartzungo Aurreku Txapelketa jokatu zuten zapatuan, Gipuzkoar erako gazteen aurreku txapelketako azkenaurreko jardunaldia, eta beste hainbat herritako dantzariekin batera, Unax Ansola eta Duna Santos elgoibartarrek ere hartu zuten parte. Inazio Bereziartua musika eskolako arduradunek esan dutenez, ondo moldatu ziren bi dantzariak. Ligako azken kanporaketa Lezon izango da, apirilaren 29an, eta Elgoibarko sei dantzarik hartuko dute parte: Haizea Luluagak Sare Meababasterretxeak, Irene Toledanok, Duna Santosek, Uxue Cabrerak eta Elaia Etxanizek.

Elkarren arteko sareak indartu dituzte toki komunikabideek Tokikomen 10. urteurrenean



Tokikom euskarazko toki komunikabideen bateraguneak 10. urteurrena ospatu zuten joan zen barikuan, Getxon. Olatua Gurutzaontzien Terminalean egin zuten jardunaldia *Komunikabideak Etorkizuna Ehuntzen* izenburupean, eta nazioarteko eta estatuko punta-puntako hainbat hizlari bildu ziren,

tokiko komunikabideek gizartean duten paper garrantzitsuari buruz hausnartzeko, komunikazio-sareen arteko lankidetzan sakontzeko eta etorkizuneko erronkei buruz aritzeko, hala nola digitalizazioa, adimen artifiziala, aisialdia, datu-kazetaritza eta demokrazia soziala. BARREneko ordezkariak ere izan ziren ekitaldian.

Islabat eta Ripoll taldeek kontzertua emango dute bihar, sotoan

Islabat talde elgoibartarrak (*K)ito* izeneko estreinako diskoa kaleratu zuen 2022ko martxoan, eta argitaratze horren urteurrena ospatzeko kontzertua antolatu dute biharko. Kontzertu berezia izango dela aurreratu dute, eta ez dira bakarrik egongo emanaldi horretan. Madrilgo Ripoll taldea ere gonbidatu dute biharko saiora, eta horrez gain, beraien hainbat lagun musikari ere igoko dira oholtzara. 19:30ean izango da kontzertua Kultur Etxeko sotoan eta sarrerak 5 euro balio ditu.



'Si las mujeres mandasen' zartzuela hilaren 21ean, Herriko Antzokian



Zartzuela eta zartzuelako emakumeen antologia da obra hau, eta zartzuelan, emakumeak egin dituen hainbat paper islatzen dira bertan, emakumearen presentziaren garrantzia nabarmenduz. Ana Otxoa sopranoa eta Alberto Nuñez bakarlarria izango dira protagonista nagusiak. Hilaren 21ean iritsiko da obra Herriko Antzokira, eta sarrerak salgai daude dagoeneko herrikoantzokia.eus webgunean.

Urteko lasterketarik onenaren Corredor Saria jaso du Mugertza Krosak

Mugertza krosa aukeratu dute 2022ko lasterketarik onena bezala, Corredor aldizkariak ematen dituen sarietan. Espainiako Olinpiar Batzordearen egoitzan, Madrilen, banatu zituzten sariak martxoaren 22an. Mugertza kroseko antolatzaileek egiten duten lana saritu du epaimahaiak. Kroseko zuzendari Zigor Diezek eta probaren ondarea berreskuratu eta mantentzeaz arduratzen den Felix Astigarragak jaso zuten saria, Alex Calabuigen eskutik.

Atletismo arloan nabarmendu diren lagunak saritzen dituzte sariotan, eta kirol arloko ordezkaritza zabala batu zen sari banaketa ekitaldira. Sari nagusiak, 2022ko lasterkari onenarenak, Maribel Perezek eta Mariano Garciak jaso zituzten. Perez abiadura-lasterkari sevillarrak bost alditan ondu zuen pista estaliko 60 metrotako Espainiako errekorra, eta aire librean Europako zein Munduko txapelketetako finalean lehiatu zen.



Mariano Garciak, berriz, Europako eta Munduko Txapelketak irabazi zituen 800 metrotako lasterketan, pista estalian irabazi zuen urrea munduko txapelketan eta aire librean Europakoa. Iaz Espainiako maratoiko errekorra ondu zuen Marta Galimany ere saritu zuten, *Urteko balentria* sariarekin. Maite Zuñigak bere ibilbidea saritzen duen saria jaso zuen; eta, Maria Forerok atleta errebelazio onenaren saria.

Morkaikok boluntarioak behar ditu Morkaikoren Eguna antolatzeko



Maiatzaren 13an izango da Elgoibarko Itzulia, Elgoibarko Itzultxoa eta Finalista Eguna batzen dituen 2023ko Morkaikoren Eguna. Mendizaleei egun horretan ematen dieten bazkaria emateko jende nahikorik ez dagoela-eta, bazkaria bertan behera lagatzea erabaki du Morkaikok. Alabaina, ohartarazi dute, beste hainbat lanetarako ere boluntarioak behar dituztela: "Aurreko egunetan zein egunean bertan antolatzen ditugun gauzetarako boluntarioak behar beharrezkoak ditugu, dena ongi irtengo bada". Egitekoen zerrenda osatu dute: ibilbidearen markaketa (maiatzak 8tik 12ra), erosketak jaso eta prestatu (maiatzak 12), Itzultxoan joateko, Metalako bidegurutzea zaintzeko, anoa postuetan egoteko, Itzulian eskoba lanak egin eta zintak batzeko... Egiteko horietako bakoitzerako beharko lituzketen boluntario kopurua ere zehaztu dute, eta deialdia egin dute, boluntarioak inguratzeko. Laguntzeko prest daudenei eguaztenetan Morkaikok Errosario kalean duen bulegora gerturatzeko eskatu diete, 19:00etatik 20:15ak bitartean, edo bestela mezua idazteko ondorengo posta elektronikora: morkaiko@morkaiko.eus. Morkaikokoak eurek jarriko dira gero izena eman dutenekin harremanetan.

Lehen mailako Gipuzkoako Txapelketa irabazi du Danobat Elgoibar Xake Taldeak

Gipuzkoako Lehen Mailako Xake Txapelketan lehiatzen diharduen Zubi-Ondo xake taldeko Danobat Elgoibar Taldea txapeldunorde izan zen iaz, eta aurten lortu dute taldekideek beren helburua: Gipuzkoako Liga irabaztea. Eta garaipen horri esker, Gipuzkoako gorengo mailan lehiatuko dira hurrengo denboraldian, Gipuzkoako xake talde onenen aurka. Taldetik azaldu dute duela 34 urte lehiatu zirela azkenekoz maila horietan. Hiru denboralditan lehiatu ostean (1987/88, 1988/89 eta 1989/90), 1990ekoan galdu zuten maila. Felix Manso, Juan Manuel Navarro, Mikel Leon, Markel Kerexeta eta Ivan Fernandezek osatzen dute iguera lortu duen taldea.

Navarro da 1990ean gorengo mailan jokatu zuen talde hartatik gelditzen den taldekide



bakarra. Jesus Angel Hijano, Gustavo Barrenetxea eta Paco Perez izan zituen taldekide orain dela 34 urte.

Alebinen eta infantilen txirrindulari lasterketa, bihar, Mendaron



Elgoibarko Lagun Taldea txirrindulari eskolak antolatuta, alebin eta infantil mailan diharduten txirrindularientzako lasterketa jokatu dute zapatuan, apirilaren 1ean, Mendaron, Erramone industrialdean. Hori dela-eta 16:00etatik aurrera itxita egongo da industrialderako sarrera. Lasterketak 16:30ean hasiko dira. Alebinek hiru itzuli eman beharko dizkiote ia bi kilometroko zirkuituari eta sei itzuli osatu beharko dituzte infantilek.

Idotorbeko bola-joko txapelketa, bihar

Gipuzkoako 52. hiru-txirlo bola joko txapelketako laugarren jardunaldia jokatu dute bihar, apirilak 1, Idotorbeko bolatokian. Tiraldia 17:00etan hasiko da. Aurreko zapatuan jokatu zuten hirugarren jardunaldia Azkoitiako Floreaga bolatokian eta Lander Odiaga (San Andres A) eibartarra gailendu zen sei txirlo jota. Jabier Osoro izan zen sailkapeneko lehen elgoibartarra. San Migel A taldeko bolaria seigarren postuan sailkatu zen.



LANA

Eskaerak

Adinekoak zaintzeko prest nago. Orduka eta gauzez ere bai. **605 402 030**

Adinekoak edo umeak zaintzeko prest nago, etxeko langile moduan edo orduka. Erizain laguntzaile titulua dut. **643 505 662**

Adinekoak edo umeak zaintzeko prest nago, etxeko langile moduan edo orduka. **643 505 827**

Adinekoak zein umeak zaindu eta garbiketa lanak egingo nituzke. **624 956 340**

Adinekoak zein umeak zaindu eta garbiketa lanak egingo nituzke. **631 309 160**

Lan bila. Adinekoak zainduz, zerbitzari moduan, eraikuntzan edota garbiketa lanak egiten esperientzi handia. **641 988 643**

Adinekoak zaintzeko eta garbiketa lanetarako prest nago. Goizez eta orduka. Esperientzia eta titulua. **632 116 534**

Adinekoak edo umeak zaintzeko prest nago. Titulua daukat. Etxeko lanak ere egingo nituzke. **685 724 861**

Adinekoak zaintzeko prest nago. Asteburu edo gauetan ere bai. Esperientzia eta titulua ditut. Garbiketa lanak egiteko prest. **631 212 497**

Adinekoak zaintzeko prest nago. **624 536 736**

Adinekoak zaintzen esperientzia handia daukat. Gauzez lan egiteko prest nago. Titulua daukat. Nekazaritzan peoi moduan ere esperientzia. **602 834 107**

Adinekoak zaintzeko prest nago. Esperientzia daukat, eta beharrezko titulazioa ere bai. Orduka. **643 071 900**

Umeak edo adinekoak zaintzeko prest nago. Etxeko garbiketa lanak ere egingo nituzke. Esperientzia daukat. **688 489 881**

Eskaintza

DBH 2 ikasle batentzat klase partikularrak emateko prest dagoen norbaiten bila gabilta. **635 750 362**

GARAJEAK

17 m²-ko garaje itxia alokatzen da, Lekuederren. Sarrera musika eskola ondotik. 3. solairua. **629 526 683**

ETXEBIZITZA

Donostian hilabete batzuetarako alokairu bila gabilta. 2023ko urritik 2024ko martxora. Amaran, Easo plaza inguruan edota hiriko erdigunean, ahal dela bi logelakoa. **639 987 645 / 690 270 468** (Olatz eta Aitor)


Etxebizitza alokatzen da Deban. Urte osoan zehar, hilabeteka edo asteka. Hiru logela, bi bainugela eta bi balkoi eder ditu. Etxea jantzita dago. Bista paregabeak. Igogailua zero kotatik. **657 795 876**

OSPAKIZUNAK

1943an jaio eta aurtun 80 urte betetzen dituzten elgoibartarrek edo elgoibarren bizi direnek bazkaria egingo dute apirilaren 29an, Txarridunan. Interesatuak 55 euro sartu, Laboral Kutxan, apirilaren 25erako: ES3830350007290071143390. 12:45ean bilduko dira Maalako elizan argazkia ateratzeko.

1973koen kinto ospakizuna, ekainaren 10ean, Belaustegin. 12:00etan luntxa, Zubi Ondo elkartearen. Autobusa 14:30ean Txankakuan. 90 euro sartu behar dira Laboral Kutxan, maiatzaren 31rako: ES69 3035 0007 27 0071143415.

 <p>administradores Consejo Vasco de Colegios de Administradores de Empresas Euzko Eskola Administrazioaren Lanbide-Itasotik</p> <p>ROSA M^ª PINTADO</p> <p><i>Etxaldean Administrazioarako-Gradu ikasketen arduraduna Alcalá de Henaresko Unibertsitatean, eta Gipuzkoa, Bizkaia eta Arabako, Errioxako eta Kantabriako ikastetxeetan. Zuzenbidean lizentziatua. Kolegiatu zenbakia: 749</i></p> <p>660 969 679 rosapf@telefonica.net</p>	<p>Gure komunitatean, presidente karguan dagoen pertsona ez da ari batzarretako aktak sinatzen, bere gogoko ez diren akordio batzuk hartu direlako batzarrean. Jakin nahi nuke ea behartu dezakegun aktak sinatzera.</p> <p>Akta guztiak presidentearen eta akta jasotzen duen idazkari-kudeatzailearen sinadurarekin itxi behar dira berez, eta akta ixten den unetik, akordioak betetzeko dira, legeak bestelakorik ez badio behinik behin. Hala ere, bere interes partikularren kontrako erabakiren bat hartu delako presidentek akta sinatzeari uko egiten badio, aski izango da idazkari-kudeatzailearen edo etxaldean administratzailearen sinadurarekin, bera delako akta jasotzen duena eta presidentearen ezetzaren arrazioak aktan jaso behar dituen. Beraz, presidentearen sinadura barik ere, akordio hori balekoa da, eta ondorioz, bete beharrekoa. Aktak presidentearen sinadura ez izateak ez du batzarrek onetsitako erabaki bat baliorik gabe uzten.</p> <p>AHOLKUA: Komunitateko presidentek akta sinatzearen esangura formal da, alde ezberdinek hartutako erabakiak konfirmatzeko modu bat den heinean. Forma kontu horiek ez betetzeak, baina, alegia, presidentek akta ez sinatzeak, ez du batzarra bera baliorik gabe uzten, ez dituelako gainerako jabeakideak babes gabe uzten.</p> <p>GOAR AHOLKULARI KOLABORATZAILEA San Bartolome, 2</p>
--------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------	------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------

Argazkiak eguzten eguerdia (12:00ak) baino lehen ekarri behar dira Barreneko bulegora, barren@elgoibarkoizarra.eus e-postara edo  **688 655 658** bidalita.



Zorionak, **Intza!**
6 urte handi!
Ondo pasa zure egunean eta gozatu topera! Segi beti bezain alai. Patxo handi bat familiakoen partez.



Zorionak, **Izaro!**
Bihar, 8 urte!
Ederki ospatuko dugu! Muxu asko, etxekoen partez.



Zorionak, **Sara,**
gaur 4 urte bete dituzulako. Muxu handi bat izeba eta Laiaren partez.



Zorionak, **Lia,**
atzo 2 urte bete zenituelako. Muxu asko etxekoen, eta bereziki, Naia, Noa, Beñat eta Maddiren partez.



Zorionak, **Jakes!**
Muxu potolo bat familiako guztion partez. Ondo pasa!



Zorionak, **Danel!**
Ostegunian 10 urte! Muxu handi bat aitatxo, amabxo eta, bereziki, Peioren partetik.



Zorionak, **Nora,**
martxoaren 28an 9 urte egin zenituelako. Zorionak aittittaren eta amamen partez. Muxu handi bat hiruron partez eta oso ondo pasa!



Zorionak, **Oihan!**
5 urte potolo!
Askoi maite zaitugu.



Zorionak, **Mara eta Enara,** 6 eta 3 urte egingo dituzuelako laster. Muxu potolo bat.



Zorionak, **Amaia eta Miren!**
Besarkada bana, familiako guztion partez.



BASO ZERBITZUAK

- ✦ ITXITURAK
- ✦ GARBIKETAK
- ✦ LANDAKETA ILARAK EGIN
- ✦ MENDIKO BELAR-SASTRAKAK KENDU

616 328 060
648 039 187
(Elmer Alaniz)
yuriscano@hotmail.com

ELGOIBAR



Jarri ezazu zure publizitatea **BARREN** astekarian edo www.barren.eus webgunean

943 743 704
688 769 657
barren.publi@elgoibarkoizarra.eus
Aita Agirre Kulturgunea, 3. 3. ezk. - 20870 ELGOIBAR

EXPRESS ESKAINTZAK!

GRUNDIG GEBM11301XC LABEA



A+

309 €

- 3D Multifuntzioa
- 72 litro
- 9 funtzio
- 2 errail teleskopiko
- Led touch kontrol pantaila
- Aginte ezkutagarriak

MILARBIRE
Ubitarte, 11 - 943 741 487 - bire@milar.es
Dendako prezioak. Produktuak agortu arte.

1 ZAPATUA

16:00 Hitzaldia: 'Eta, zu nork zaintzen zaitu?'. Gaztelaniaz, etxeko langileentzat. Lilan.

16:00 Kilimon Trail, Mendaron.

16:30 Alebinen eta infantilen txirrindulari lasterketa, Mendaron. Erromane industrialdean. Lagun Taldeak antolatuta.

19:00 Kontzertua: Ripoll eta Islabat. Kultur Etxeko sotoan. Sarrera, 5 euro.

2 DOMEKA

10:00 Diana: Elgoibarko dultzaineroekin.

12:30 Elgoibarko Udal Musika Bandaren kontzertua. Herriko Antzokian.

Egitaraua:

1. *El tambor de Granaderos* (R. Chapi)
2. *Bocetos del Cáucaso* (I. Ivanov)
3. *Jerusalem* (J. Velez)
4. *The mask of zorro* (J. Horner)
5. *La tabernera del puerto* (P. Sorozabal)

4 MARTITZENA

18:00 San Bartolome jaiak antolatzeo bilera irekia. Aita Agirre kulturgunean.

9 DOMEKA

10:00 Bisita gidatua: 'Dolmenen ibilbidea'. Euskaraz. Debegesak antolatuta. Erreserba egiteko: 657 794 677

13 EGUENA

19:00 Hausnarketa saioa: 'Isiltasun eskola'. Kultur Etxeko sotoan.

14 BARIKUA

10:00 Bisita gidatua: 'Dolmenen ibilbidea'. Gaztelaniaz. Debegesak antolatuta. Erreserba egiteko: 657 794 677

18:30 Zazpigarren arteari buruzko kafe tertulia. Loredi Salegik gidatuta, Lilan. Doan, eta denontzat. Bukaeran, mokadutxoa.

16 DOMEKA

15:15 Jubenil mailako Valentin Romera txirrindulari lasterketa. Lagun Taldeak antolatuta, Mintxetan hasi eta bukatuko da.

20 EGUENA

17:00 Hitzaldia: 'Egokitzapenen garrantzia'. Igor Floresek emango du, Dislegi Debarbarreneko elkarteak antolatuta. Kultur Etxean.

21 BARIKUA

19:00 Zartzuela: 'Si las mujeres mandasen'. Herriko Antzokian. Sarrerak erosteko: herrikoantzokia.eus

Aste Santuko eta Pazko elizkizunak

ELGOIBARKO SAN BARTOLOME PARROKIAN

Apirilak 2 'Erramu Domeka'

10:30 Erramuen bedeinkapena eta prozesioa.

11:00 Meza familiarra.

Apirilak 3 'Astelehen Santua'

19:00 Talde penitentzia.

Apirilak 6 'Eguen Santua'

10:00 - 12:00 Bakarkako penitentzia.

20:00 Jaunaren afariko meza.

Segidan, Sakramentu Santua gurtzea.

Apirilak 7 'Bariku Santua'

10:30 Gurutze Bidea.

18:30 Jaunaren nekaldiko ospakizuna.

Apirilak 8, zapatua

21:00 Pazko gaubeila.

Apirilak 9 'Jaunaren piztuerako Pazko Domeka'

10:45 Pazko meza.

Segidan, topaketaren prozesioa.

MENDARON

Apirilak 2 'Erramu Domeka'

12:30 Erramuen bedeinkapena eta eukaristia (Garagartzan)

Apirilak 3 'Astelehen Santua'

18:00 Elkarteko adiskidetze sakramentua (Azpilgoetan). Hileta balego, martitzenean egingo dute aitortza.

Apirilak 6 'Eguen Santua'

16:30 Jaunaren azken afariko eukaristia (Garagartzan)

21:00 Ordu Santua (Garagartzan)

Apirilak 7 'Bariku Santua'

11:00 Gurutze Bidea (Garagartzan)

16:30 Jaunaren nekaldiko ospakizuna (Garagartzan)

Apirilak 8, "Zapatu Santua"

21:00 Mendarotik Mutrikura autobusa, elkarrekin Pazko Gaubeila ospatzeko.

Apirilak 9, "Pazko domeka"

12:30 Pazko igandeko eukaristia (Azpilgoetan)

Zinea



'Ellas hablan'

31 barikua: 19:00
 1 zapatua: 19:00 / 22:15
 2 domeka: 19:00
 3 astelehena: 21:00

'El asombroso Mauricio'

2 domeka: 16:30

'Irati'

6 eguena: 19:00 (gaztelaniaz)
 7 barikua: 19:00 (euskaraz, gaztelaniazko azpitoluekin)

'Loli tormenta'

8 zapatua: 19:00 / 22:15
 9 domeka: 19:00
 10 astelehena: 21:00

Oharra

Aste Santua dela-eta, datozen bi asteetan ez dugu **BARREN** aldizkaria kaleratuko. Online edizioa, baina, jai egunetan soilik etengo da, eta gainerako egunetan Elgoibar eta Mendaroko berri emango dugu **barren.eus** atarian. Hurrengo alea apirilaren 21ean kaleratuko dugu.

2023ko botika ordutegiak: 09:00-13:00 / 16:00-20:00

GUARDIAK: Egunez: 09:00-22:00 Larunbatak: 09:00-14:00 (■)

OHARRA: 2023an ez da iluntzeko farmazia zerbitzurik egongo Elgoibarren.

MARTXOA

31 BARIKUA

APIRILA

- 1 ZAPATUA
- 2 DOMEKA
- 3 ASTELEHENA
- 4 MARTITZENA
- 5 EGUAZTENA
- 6 EGUENA
- 7 BARIKUA
- 8 ZAPATUA
- 9 DOMEKA
- 10 ASTELEHENA
- 11 MARTITZENA
- 12 EGUAZTENA
- 13 EGUENA
- 14 BARIKUA
- 15 ZAPATUA
- 16 DOMEKA
- 17 ASTELEHENA
- 18 MARTITZENA
- 19 EGUAZTENA
- 20 EGUENA
- 21 BARIKUA

Egunez

■ Ibañez

Egunez

- Garitaonandia
- Garitaonandia
- Arriola
- Fernandez
- Yudego
- Fernandez
- Fernandez
- Garitaonandia
- Garitaonandia
- Garitaonandia
- Arriola
- Fernandez
- Yudego
- Oruesagasti
- Arriola
- Arriola
- Ibañez
- Garitaonandia
- Arriola
- Fernandez
- Yudego

2023 urte guztian, gaeuz: 22:00-09:00

Cristina Sanchez Castaño - Julian Etxeberria, 7 (Eibar)
943 203 052

■ Fernandez:

Herriko Enparantza,4
 Garagartza (Mendaro)
 943 756 142

■ Ibañez:

Rekalde, 1 (Soraluze)
 943 751 638

■ Oruesagasti:

Kalebarren, 9 (Soraluze)
 943 751 384



**Aukera paregabea
 sukalderako
 nahiz jangelarako
 mahai zabalgarri
 eta aulki tolesgarri
 eta pilagarrietan.**



|| Gelatik plazara salto egin dute bertso eskoletakoek




Gipuzkoako Bertsozale Elkarteak *Gelatik Plazara* ekimena antolatu du estreinakoz, bertso eskolekin elkarlanean. 14 urtez azpiko ikasleei jendaurrean trebatzeko aukera emateko sortu dute ekimena, bai eta bertso eskoletako ikasleek elkar ezagutzeko aukera izan dezaten ere. Guztira 170 ikasle ari dira ekimenean parte hartzen, 2-3 lagunez osatutako taldeetan. Ekimen horren barruan, barikuan, elkar ezagutzeko aukera paregabea izan zuten Elgoibarko, Soraluzeko, Mutriku eta Mendaroko bertso eskoletako ikasleek Elgoibarko Kultur Etxeko Sotoan egin zuten saioan.

Elgoibarko eta Soraluzeko bertso eskoletako irakasle Eneko Beretxinagak egin zituen aurkezpen lanak, eta ondorengo lanak bete behar izan zituen talde bakoitzak: aurrez prestatutako agurra kantatu, puntuari erantzun koplatan (oina emanda batzuetan eta oinik eman gabe besteetan), gaia edo oina emanda koplata edo bertsoa osatu eta koplatan Alexander Idoeta edo Irune Basagoiti bertsolariei erantzun, gaia emanda. Eta ariketa guzti horiek areto bete jenderen aurrean bete behar izan zituzten.

Jende aurrean kantatzen zuten estreinako aldia zuten askok eta igarri-igarrikoa zen mikrofono aurrera egiten zuten joan-etorri urdurietan, baina saio polita ondu zuten denen artean. Bukarera, parte hartzaile guztiak jaso zuten saria: serigrafiatutako botila bat eta diploma. Baina beste sari bana ere banatu



zuten, bertso eskoletako irakasleen iritziz LHko eta DBHko talderik onenek jaso zutena. Saioa bukatzeko, mokadua ere izan zuten gaztetxoek. Argazki gehiago: barren.eus



IV. URTEURRENA

Adoracion Garrido Navarro

2019ko apirilaren 9an hil zen, 78 urte zituela.

**Gure bihotzetan zaude eta
zeruko izarrekin batera distira egiten duzu.**

Etxekoak



Mari Carmen Agirregomezkorta Elizburu

2023ko martxoaren 23an hil zen, 88 urte zituela

**Barre eragiten artistia,
presumidia, dotoria,
Arraitzan, Mandiolan, kalia
topera zuk umoria,
unerik zaillenetan be sendo
erakutsiz adoria,
famili ta lagunei emonaz
indar eta amoria,
alaitasun hau gozatu izana
gu danontzat ohoria.**

Etxeko senideak eta Mandiola-familia



Josefina Ulacia Etxeberria


1930/02/03 - 2023/03/23

Sendiak bihotzez eskertzen ditu jasotako doluminak,
bai eta hileta elizkizunetara agertu izana ere.

Hitez baino areago, izanez zatzaizkigu mintzatu.

Hitez baino areago, izanez gaituzu maitatu.

Eskerrik asko, ama, amama.



Eskertzak eta urteurrenak **943 743 704 / 943 744 112**
Aita Agirre Kulturgunea, 3, 3. ezk - barren.publi@elgoibarkoizarra.eus

ILUNBERRI ACADEMIA 2023 HITZALDIAK

Goi erdi aroa: Mende ilunak argitzen

AITA AGIRRE KULTURGUNEAN, 19:00ETAN

Apirilak 19, asteazkena:

'Baskonia erromatar aldiaren azkenetan eta ondoko mendeetan'

JOKIN LANZ BETELU

Apirilak 27, osteguna:


'Akitania-Baskonia eta franko karolingioen erresuma aurrez aurre'

IÑAKI LOPEZ DE LUZURIAGA

Maiatzak 3, asteazkena:

'Orreagako bataila (778)'

XABIER IRUJO



ELGOIBARKO IZARRA

Buskaitasunaren Tokiaren



ILUNBERRI
ACADEMIA



ELGOIBAR
UDALAK

ALFUNDUNEN